

四庫全書

集部

欽定四庫全書

集部

南宋襟事詩卷三

詳校官監察御史<sub>臣</sub>孫家賢

主事銜<sub>臣</sub>徐以坤覆勘

覆校官編修<sub>臣</sub>汪鏞

校對官助教<sub>臣</sub>羅萬選

謄錄監生<sub>臣</sub>趙興文

欽定四庫全書

南宋禱事詩卷二

錢唐吳焯撰

艮嶽曾經號鳳皇  
東京特地擬餘杭  
奇亭巧石神霄夢  
月上俄聞唱海棠

雲麓漫鈔政和五年命內官梁師成築山於景龍門側象餘杭之鳳皇山遂賜名鳳皇後神降有艮嶽排空霄之語又名艮嶽今臨安府大內麗正門之正面即茲山也艮嶽記介亭最高於諸山前列巨石凡三文許號排衙石案介亭排衙石俱在鳳皇山側宋之都杭有先兆矣雲麓漫鈔徽廟內禪幸淮浙嘗作小詞名月上海棠宋云孟婆且與我做些方便其意指風竟成孟太后讖華陽宮記事艮嶽有飛來

峰

靖康字識啟金微名單黃羅局上飛誰道漢家兵制闕  
陰符蚤已著神機

鐵園山叢談靖康改元中書擬進年號取日靖四方  
永康兆民請號年曰靖康其文為十二月立康也後  
一年康王中興北狩見聞錄曹勛扈從北行時太  
后未知主上即位嘗用象戲局子裏以黃羅書康王  
二字貼將上禱曰令三十子俱擲於局若康王字入  
九宮者必得天位一擲其將果入九宮補漢兵志  
宗正少卿錢文子以班史無兵志因而補之蓋有慨  
乎南渡後兵食冗濫而富平符離之役棄師累十萬  
莫正其罪假漢兵志以寓意焉神機制敵太白陰  
經南宋內府鈔本兵家之要典也凡十卷末有寫勘

監收  
等名

更鑄新銘帝命宣儒臣皇祐有遺編洛鍾不響土圭冷

太史頻煩測會天

建炎以來朝野雜記紹興十六年鑄景鍾高九尺天子親祠上帝則用之以皇祐泰尺為準於是上命秦檜銘之曰德純懿兮舜文似躋壽域兮孰內外薦上帝兮偉茲器聲氣應兮用久視貽子孫兮彌萬世

皇祐新樂圖記仁宗皇祐二年院逸胡瑗等奉詔修凡三卷十二篇會天厯寶祐四年荆執禮等纂造

南渡以後自統元至會天厯名凡七改是歲在丙辰元日立春因定是名學士尤焞被命製序具註頒行

我好來朝即便留行都不改舊杭州歌聲隱隱江湖上

虹氣分明志斗牛

毘陵錄高宗生時徽宗夢吳越錢王引上衣云我好來朝便欲留我終須還我山河淳熙十四年宰執奏事延和殿上因論高宗謚法語及此事案此稱錢王指倣也舊志謂是武肅皆祖洪邁之說吳越世家疑辯李琪武肅王碑江湖之上棹有歌聲斗牛之間獄無冤氣

歲幣年年訝許同紅蠶南國號靈蟲巧機花匠休離手  
柿蒂原充職貢中

蓉塘詩話樂天詩紅袖織綾誇柿蒂柿蒂綾紋也夢梁錄杭產綾曰柿蒂狗脚後人改為柿葉者妄也元豐九域志杭貢綾三十匹丘陵學山有黃省曾蠶經一卷言杭地蠶事最詳

欲負龍歸計太貪鸞聲先報下江南柳林一議驅俘馘  
誓不尋盟死不甘

北窗炙輠字文虛中始陷於金後仕為國師遂得其  
柄令南北講和太后之歸資其力也後欲挾淵聖以  
歸為人告變論死迎鑾七賦太尉曹勛墨跡勛自  
奉還徽宗梓宮及韋太后乃作迎鑾七賦題分為七  
實止一篇其裔世居海鹽保有此卷後歸花山馬氏  
余得見之脚氣集金諸大臣會於黑龍江柳林議  
遣秦檜歸國言彼得志吾事可濟檜至計果得行廢  
殺諸將而南北之勢定金亦德之誓書中必有不輕  
易相語而檜亦發宇文虛中事以報  
之此金人自言之見於金國南遷錄

不裹冠巾女聖人雕弧那羨十流銀更饒艷思輕紅句

粉浣香梳十指春

四朝聞見錄高宗憲聖吳后侍高宗航海金騎猝至  
欲挈御舟后發一矢應弦而倒高宗重於視師后奏  
曰若臣妾裹尺五阜紗須一往矣 弧矢譜有跪蹙  
弩最為利害張憲中林之伏張浚射狐闌之捷皆用  
此弩制勝此書不著撰人紹興間曾進御者 韵石  
齋筆談憲聖能詩題徐熙牡丹云吉祥亭下萬千枝  
看盡將開欲落時却是雙紅深有意故留春色緩人  
思題芍藥云穠李夭桃掃地無眼明驚見玉盤盂揚  
州試識春風面看  
盡羣花總不如

日日攻書腕骨靈清江白鹿拓朱檀鈎金不獨松門字  
先飾涪翁戒石銘

書學纂要高宗在內殿作書日有程課至正直記  
宋紙有單鈔清江名曰白鹿乃龍虎山寫籀之紙又  
曰白籀四朝聞見錄紹興二年六月頒黃庭堅戒  
石銘於郡縣亦用金書不獨飾吳說九里松字也  
咸淳臨安志九里松  
一字門亦曰松門

亂似羣雅腫似豬聯綿新體果何如銀漿蠲紙沙錐利  
好趣游絲一筆書

書苑菁華吳說傅朋出已意作游絲書世謂前代無  
有趙與時云唐書呂向能一筆環寫百字若紫髮然  
號聯綿書即此體朝野類要臨安有蠲紙者澤以  
粉漿使之瑩滑謂之蠲紙太倉稊米集題吳傅朋  
游絲書聊將畫沙  
錐幻出蟲網壁

山岳英靈久不磨虎兒談律繼梁羅子瞻風采人門重

豈獨斜川號小坡

曲洧舊聞李廌方叔祭坡公文皇天后土鑒平生忠義之心名山大川還千古英靈之氣小字錄蘇子

由子進小名梁适小名羅遠小名虎兒東坡詩高談付梁羅詩律到阿虎案思官成忠即秘書省搜訪北

宋末人朝野襟記高宗雅敬蘇文忠止稱子瞻或稱東坡浮溪集蘇軾孫符政宣教即勅有云賈生

明王道漢錄賈嘉之能魏公進忠規唐表魏謨之烈人門並用今古所同其振爾之家聲以待予之器使

小坡解與竹傳神小坡蘇過也有斜川集

愛他鈎勒與橫歌恨不生同黃米時繡幄裁成翰墨志

一規明月下宮墀

筆塵山谷書善用鉤勒米家父子得橫欹執後村  
題跋光堯喜書畫自恨不與黃太史米南宮同時

高宗翰墨志一卷今見於王氏書苑者全凡二十六  
條有自序養蒙集思陵金書扇詩超然塵外萬緣

空得失何須問寒翁鉤畫尚  
留奎壁潤欽歸明月一規中

錢源雪雲接龍溪才過橫坑二水齊白日陰崖叫鷓鴣  
野花開遍刺棠梨

雲麓漫鈔靈隱寺東西瀟二水東龍源橫過寺前即  
龍溪冷泉亭在其上西曰錢源二水合出橫坑橋案  
龍溪龍源宋時  
之名今志所無

絕品銘心未肯降翰林花月醉春江清明不見河中景  
湖上空聞戲綵雙

向氏圖畫記翰林張擇端善畫城郭舟車人物其所  
作清明上河圖西湖爭標圖二圖紹興中入內府並

選入  
神品

龍衮遙升啟虎關奉常官立最先班宣和雅樂如何補  
知在先皇指節間

夢梁錄明裡詩龍衮初升殿陞階奉天酌祖藏皇儀  
虎闕夕啟威來熙從坐紛綸衛百祇雲麓漫鈔紹  
興十六年禮器局造祭器用博古圖雅樂用大晟府  
制度大晟樂之景鍾當時用徽宗指三節為三寸蓋

崇寧四年所鑄者是也 樂府雅詞首冠調  
笑絕句云是九重傳出此大晟樂之遺音

枉被人稱紫府仙原芝怎不究先天君王雅愛通經士

### 圖畫龜龍進巨編

四朝聞見錄張孝祥精於翰墨人稱紫府仙惜其與  
南軒諸人為友而不能續伊洛之統于湖居士集  
紹興二十四年芝產太廟前楹張孝祥作原芝文推  
衍符瑞之說周易經傳集解福清林黃中著凡三  
十六卷淳熙十二年進御降詔褒美案此書精研該  
貫第以其曾糾朱子學者非其人而黃勉齋集祭黃  
中文有云玩義經之文象宛筆削於獲麟立朝正色  
雖當世大儒或見擯斥著書立說雖前賢篤論不樂  
因循然則朱門高弟稱許亦至矣徐尚書  
開雕經解此書不入或亦以朱子故與

亭深喬木貯張穠直上彤庭認筆蹤不似韓家失機表  
勸君餘暇誦車攻

刺源集張忠烈王開國於循而置邸於杭所居之坊  
曰清河有喬木亭在焉因為之記雪履齋筆記張  
俊有愛姬乃錢唐妓張穠頗涉書史拓皋之役俊發  
書囑以家事穠引霍去病趙雲事以堅其心俊以其  
書繳奏上親書獎諭張韓皆中興名將皆有奇女子  
又皆出微賤亦奇矣中興編年紹興五年上書車  
攻詩以賜輔臣曰當與  
御等勉勵以修政事

松花如粟布前除嶺脊猶傳古宅徐一笑湖西梅處士  
茂陵書去野亭虛

北窗炙輠錢唐兩處士林和靖居孤山徐沖晦居萬松嶺夾湖相望徐之孫忞猶守故廬語人曰先祖有言子孫世世勿離錢唐永無兵燹徐精數學也按先生名奭賜號沖晦

金鈴獵獵降香回佛跡多憑梵夾開不信香山老尊宿

玉顏花貌坐蓮臺

朝野類要內宮有祈禱賜香於天竺大士五百羅漢名記宋時記江陰軍乾明院羅漢名號按淨慈寺亦有五百塑像曹勛為記特以名不著於梵夾此名號不知何所本淳熙三山志懷安大中寺有八百羅漢像是又不止五百也曲洧舊聞蔣穎叔用香山僧懷畫之請取唐律師弟子義常所書大悲之事云國莊王不知是何國王有三女幼者多妙善施手眼救父此與楞嚴經及大悲觀音等經頗相失華嚴云

善度城居士韓瑟眠羅頌大悲為猛勇丈夫今香山  
乃大悲成道之地謂是生王宮以女子身顯化考古  
德翻經所傳者絕不相合不知穎叔何  
意而粉飾之以猛勇丈夫易為女子也

赤岸前頭赤羽驅平江供遞五千夫龍茶宣賜無箋表  
蚤駕冰簪過鼎湖

雲麓漫鈔金國每年賀正旦使平江排辦司供役凡  
五千三百十四人武林舊事北使到闕先遣中使  
至班荆館宣賜龍茶香合餐耳錄道君北狩凡金  
人有賜齎必索一謝表雲麓漫鈔賀正多值冰雪  
有司作浮筏前用巨碓擣  
冰謂之冰簪以迎北使

雄關入界三千里上國于京六十程累葉統傳分歲月

兩家書在記和盟

大金國志自臨安府餘杭門起至雄州舊界口凡三千二百七十里又自雄州起至金之上京會寧府凡二千七百五十里通計六千零二十里刻源集天台潘可大哀宋自建炎丁未迄德祐庚子金自天輔戊戌迄天興甲午撥提綱要各為南北紀年三朝北盟會編宋朝散大夫清江徐夢莘商老換案此書分三編上宣政中靖康下炎興靖康以後採諸家纂紀二百六十餘種最為詳洽總二百五十卷後又有集補五十卷未見

早聞玉盃出塵闕更設淘沙最慘顏不計本根江乘壘  
空教保護劍門山

劉豫事跡豫見兵士賣玉盃疑非民間物鞠之果出  
山陵中金人發掘時得之豫遂置河南洶沙官發掘  
諸陵括取棺中水銀等物上代陵寢及民間塚墓無  
有免者案北宋發陵起於金人繼於逆豫惜其時無  
冬青引後人不復傳述耳考王惲秋澗集載豫祖塋  
在阜城縣元時尚稱御莊石馬存焉天道固難問矣  
東南防守利便有建康根本論景定建康志白  
下本江乘之白石壘玉牒初草嘉定中詔臨安府  
北山劍門嶺毋得伐石以張齊賢論其洩  
山川之氣故也案栖霞嶺又名劍門嶺

才罷三盃丞相嗔想夫憐曲有前因從今閣下乘龍聳  
莫解金刀與別人

雲麓漫鈔秦相十客郭知運迎客吳益嬌客郭臨安  
人登科以少俊選為孫媚秦每夕必留三盃郭多夜

出秦嘗以佩刀分遺諸壻郭獨失秦怒會夜出令門者勿納遂罷親吳宜興人以門蔭遂令繼郭為姻改秩為臨安倅秦薨罷之

兒家不繫守宮砂曾拊金枝綴玉葩  
細馬盤馱成隊去傷心猶奏後庭花

蘆蒲筆記資政王復守徐州與子侑均死靖康之難和議成上憫其忠令侑諸女入禁中命宮嬪養之凡十餘年一日曝書內庭上見囊封有忠烈二字亟取閱乃王氏女入內事即日召見賜金幣敕命遣嫁歸潛志宋宗室家姬流落於金吳彥高詞云南朝千古傷心事猶唱後庭花

天上何曾下玉棺人間偷把淚珠彈  
可知故鬼依新鬼

祔室前頭已奉安

中興編年紹興三十一年八月淵聖凶問至詔臣民發哀成服廟號欽宗遙稱獻陵明年閏二月祔木主於太廟案咸淳臨安志紹興四年命守臣梁汝嘉建太廟於瑞石山左以奉列主後又設配享功臣位於橫街南西湖志謂太廟獨缺欽宗不祀考欽宗祔廟詳於宋史嘗下詔議配享功臣廷臣謂欽宗在位不久無可當配享者故缺焉咸淳志記配享諸臣名於列宗之下因無欽宗田誤讀此志耳高宗不復父兄千古議之乃責其不祀欽宗冒昧一言遂啟後來罔謗不可不辨

漢祖關前兵有壘劉伶臺下酒如池  
閉關頌酒斯何意  
知是風流女畫師

志雅堂襍錄李伯時盧鴻草堂圖曾收入高廟劉娘子位者有奉華大小二印又有閉關頌酒之裔一印此劉家事然以婦人用之恐不類也  
畫法年紀劉妃工畫人物

規模不定事逡巡和福寧須怨相秦可恨將軍無死地  
荒郊一窳賈宜人

識遺紹興中張燾上言曰一紀之間命相十四執政遞遷無慮二十人宜其和戰紛紛迄無成功故燾直謂規模不定也  
知稼翁集解試以和我國之福發策南宋相眼詔臨安府訪求岳將軍尸其墳在錢唐門外當時私號賈宜人墳

鄴邸金陀著錄成桃溪難認手題名未詳蘄國爭三字

猶賴文昌傳一生

玉楮集岳珂封鄴侯進紀恩詩 岳珂著金陀粹編  
二十八卷續編十三卷述家王之事最詳 雲麓漫  
鈔宜興張渚張氏園臨水號桃溪岳侯曾館其家題  
名廳事云近中原板蕩金人長驅如入無人之境將  
帥無能不及長城之壯余發憤河朔起自相臺總髮  
從軍大小二百餘戰雖不及遠涉邊荒亦足快國事  
之萬一今又提一壘孤軍振起宜建康之城一舉而  
復今且收兵養卒以待如或朝廷見念賜予器甲使  
之完備頒降功賞使人蒙恩即當深入邊庭迎二聖  
復還京師取故地再上版籍他時過此勒功金石豈  
不快哉此心一發天地知之知我者知之建炎四年  
六月河朔岳飛書岳岳陷罪其家洗去隱隱猶見案此  
篇見於粹編者作五岳祠盟記寥寥數語故拈出之  
宰輔編年錄岳鄂王獄具秦檜言岳雲與張憲書

其事體必須有蘄王爭曰必須有三字何以使人甘心案此三字與中興紀事本末同今皆作莫須有恐不若紀事之得其實也 金陀粹編珂自序先王勲在王家人名在國史遺跡之存者文昌章公傳而上之朝案珂忠武之孫數文閣待制霖之子

圭田新錫奉烝嘗無復東家舊講堂天水兒童幾輩輩

### 風煙隔斷柳林莊

朝野雜記中興後行聖公孔玠奔至行在上以孔子林廟隔絕特賜衢州田以奉祠事 東家雜記先聖四十七代孫孔傳編首列杏壇圖說 清波別志國家上世陵寢在保州保塞縣東三十里御莊在焉號柳林莊

孔門弟子自清羸髣髴塑俄更舊表儀為有龍眠傳搨去

可曾新樣畫淳熙

咸淳臨安志淳熙四年建石經閣遂新兩學議者以廟中諸賢舊像無福厚氣象遂令改塑其舊像遷於首善閣李龍眠有孔門弟子畫像刻於石藏石經閣

嶧雨鳧雲天際昏誰從配食憶魚門七篇幸不亡金鏡

敕付東朝細討論

朝野襟記兖州鄒縣有孟子廟政和中詔以樂正子克配享并從祀公孫丑萬章浩生不害孟仲子陳臻充虞屋廬連徐辟陳代彭更公都子咸丘蒙高子桃應盆成括季孫子叔渡江後鄒魯隔絕孔廟既立而

孟獨無行在諸賢宜留意也 名勝志魚門古鄒城也 東宮備覽靖康時侍御史胡舜陟上言以中書舍人胡說之乞令皇太子講諸經而廢孟子竊謂孟軻氏發明聖道豈可以為百家而黜之使皇太子不聞七篇之義今請東宮官進講仍舊制用孟子

伐鼓淵淵揮扇同巧思射覆女郎中後來傳得千文虎  
字畫分離隱謎工

賓退錄都下擊鼓射字之伎全用切韻法該以兩詩詩皆七言全用支齊有平無仄以應鼓節亦有揮摺疊扇同是一法 武林舊事諸色伎藝人射覆有女郎中 七修續藁余有一敗帙惟序可讀乃勝國謎社之書名曰千文虎

野雲戲罷擲金錢  
擘撲爭傳冷節前  
聞道十家春繡倦  
不扶綵索上秋千

雲麓漫鈔歲將除  
都人相率為儺  
俚語謂之打野狐  
亦呼野雲戲  
又擘撲食物法  
有禁令凡元正  
冬至寒食三節  
京尹出榜放三  
日或以數十筭  
銀或以樂藝女  
人為一擲其他  
百物無不然  
孝宗儉德記宮  
中無秋千之戲

父子唐虞有憲章  
郊山宮闕可相望  
紛披玉檢勞雙隻  
曾悔中書去一綱

蕭臺公餘詞薰風解愠  
手握乾符躬揖遜  
廊廟無為天子親傳  
萬歲卮恩覃湛露和  
氣歡聲均海宇  
嵩岳

三呼父子唐虞千古無松隱集德壽宮春帖子曉  
來簾幙捲東風尚有春寒下綺櫳德滿人間和氣浹  
卯山宮殿瑞雲中玉牒初草李安行奏寧宗曰陛下  
雙隻皆視朝而延訪之時不及雙隻猶言雙日單  
日玉筭集咏史有一  
網謠為李忠定作也

鈞容法部幾班頭半是吳歆半楚咻誰解綠腰花十八  
但教小令整歌喉

朝野類要教坊之名唐時屬太常本朝增東西兩教  
坊又別有化成殿鈞容班中興後因之紹興末臺臣  
王十朋上章請罷凡名伶俊伎留充德壽宮其餘多  
隸臨安府雖有教坊之名多是市井之輩不知音律  
碧難漫志琵琶六么一名綠腰其曲中有一疊名  
花十八又有人過鈞容班教坊問曰某宜何歌必

曰汝宜唱曹

元寵小令

飲馬歌殘絡馬銜浮屠軍已越重巖尋宮儻入黃鍾調

蚤向陽山進一帆

松隱集飲馬歌邊頭春未到雪滿交河道暮沙明殘  
照塞烽雲間小斷鴻悲隴月低淚濕征衣悄歲華老  
自注此腔傳自金中飲午馬即橫笛吹不鼓不拍其  
音淒斷聞烏珠每對陣吹此則鏖戰無還期也建  
康集征烏珠詩快飲莫辭金盞落先聲須破鐵浮屠  
注金將下親兵皆精練號鐵浮屠軍至正直記文  
丞相入燕聞軍中歌阿剌來曲驚曰此正黃鍾之音  
南人不復興矣建炎航海記建炎海上之役烏珠  
由鄆入海望大洋中隱隱一山問海師何所對曰陽  
山烏珠嘆曰吾得至此足矣下令返棹其日御舟將

如館頭亦過於風不爾幾  
殆蓋天所以聞中興云

親見宣豪寫洛神殘碑重捲淚宮嬪後來石刻應鋪敘  
猶記花門舊日春

書史會要高宗自言學書惟視筆法精神朕得王獻  
之洛神賦六行置之几間日閱數十過自覺於書有  
所得 玉林詩話高九萬觀思陵墨本詩淡黃越紙  
打殘碑盡是先皇御製詩白髮內人和淚看為曾親  
見寫詩時 石刻鋪叙建昌曾宏父撰叙高宗  
御書石經本末特詳南渡後秘閣帖亦加詮訂

毛詩一卷誦交交風過泠泠竹韻敲偶為尋花行別殿  
棚簾不捲結蠨蛸

滄洲集春日夫人閣詩君王著意在經幃無復瓊林宴賞時從此六宮休鬪草碧紗窓下讀毛詩 孝宗  
儉德記上在禁中凡先皇  
游玩之處多局鋪不御

清鍾杳杳碧波深塏影扶雲出梵林何取香山舊詩句

### 一山兩寺漫追尋

詩人玉屑中興後詩如趙天樂冷泉夜坐鍾樓晴聽  
响池水夜觀深秋聲集靈隱詩兩峰塏影天垂蓋  
千佛林光地布金東坡詩集自注往在虔州天竺  
寺見白公親書天竺寺寄韜光詩案此則虔州別有  
一天竺寺因韜光原住靈隱寺故有天香  
桂子之句咸淳志稱舊志不收此詩是也

稜層孤塏倒江波六合於今號六和不見一瓶明似雪

龍山依舊莽煙蘿

四朝聞見錄衛涇字清叔自僉模奉召而不入國門  
翱翔於江上六合塢又宋藝圃集李沆有題六合塢  
詩雪溪集王鉉云余與郭壽翁別於錢塘追送至  
龍山白塢寺又江月松風集白塢詩宋宮傳自唐朝  
寺白塢崔嵬寢殿前崇此則一白塢唐代物宋時已  
在禁中嘉木楊喇勒智裏宋陵骨而建稱鎮南塢俗稱  
一瓶塢者又一塢也西湖志雖兩載白塢不為疏明  
又考清江集穆陵行云江頭白塢今不見則鎮南塢  
自明初剗去之也如此兩  
塢本末朗然今志多誤

皇壇高敞坐神農指向吳山第一峰藥局有方還證類  
不知仙草閱靈踪

咸淳臨安志南渡初有商立者攜神像至杭舍於吳山因以為祠都人有疾禱者必應遂以其神為神農云巢商立所攜之神即指為神農西湖志誤作閣上另塑一神農像當從咸淳志太平惠民和劑局方紹興六年置藥局四所一曰和劑局十八年改熟藥所為太平惠民局取大觀刊正藥局方添補紹興寶慶淳祐諸方暨吳直閣諸局方證類本州大觀初唐慎微撰紹興中詔王繼先校定附以釋音付國子監鏤板白雲仙人靈草歌凡圖靈草五十四種各附以歌南宋秘書書也

館閣藏書校更繁綜甄簿錄列庭軒崇文舊目依稀見  
去盡源流割幾番

朝野襟記中興館閣書目淳熙中修渡江後書籍散佚紹興十三年建秘書閣以秦燬提舉秘書省掌求

書籍至是數十年所藏充牣乃命館職為書目陳騭  
領其事綱例皆倣崇文總目凡七十卷案今中興館  
閣書錄十卷淳熙四年陳騭撰李燾序續錄十卷嘉  
定三年館閣重編其後次第補錄迄於咸淳然今所  
傳非完書也 崇文總目六十六卷舊於各書下  
疏明源流自鄭樵盡削之今所傳者僅書名耳

手畢應防典墨兵野人識小太言諄尚書筆札經題後

雪柏霜松無此清

分門瑣碎錄孫樵謂史書為墨兵 朝野稗記秦主  
和議禁私史秦死郡國多鋟本嘉泰中言者請仍舊  
禁續資治通鑑長編李燾撰乾道初命給筆札寫  
進淳熙十年上其書自建隆至靖康凡九百八十卷  
舉要六十八卷詔付秘書省案此書今所傳者一百  
七十五卷從閣本錄出 南軒集李文簡長編如霜

松雪柏生死文字問 水心  
集長編自春秋後才有此書

文鑑經時未始刊 惛惛理學固糾彈  
家山尚有圖書在 不比東萊費墨丹

宋文鑑臨安書坊先有聖宋文海孝宗得之命本府  
校刻益公請加銓擇上屬之呂伯恭書成賜名皇朝  
文鑑有近臣密啟云奏議中有詆及祖宗政事者不  
可示後世乃更命直院崔大雅增損後有道學之禁  
以有伊川文遂詆伯恭上不復降出此書當時近未  
刊也 家山圖書文公私淑弟子之文傳於許魯齋  
其書以易中庸古大學古小學參列成圖綱領條目  
極為精詳 朱子語類朱子云呂伯恭編次文鑑徒  
耗損精力  
無所裨益

稽古如何不鑒今輪臺甄別倍森森可知千古公言是  
惜爾搜羅系譜心

龔頤正著元祐黨籍譜系一百卷悉取籍中三百九  
人各為傳佚者四人而已龔頤正後又著續稽古錄  
美侂冑功侂冑死詔臨安府毀其書梁溪漫志紹  
興間詔贈卹元祐黨籍諸賢言者謂中多奸邪下詔  
甄別其人帶經堂集蔡京手定黨籍原有二本南  
渡後合二本校勘詳定慮中有奸人耳所云三百九  
人乃京第二本案宋史崇寧元年籍黨人凡一  
百二十人御書刻石端禮門者是為第一本

元祐忠良冤始雪慶元理學禍重胎寧知御閣移碑去  
又見神州置牓來

中興編年慶元偽學之禁凡五十九人宰執四人趙汝愚留正王蘭周必大待制以上十三人朱熹徐誼彭龜年陳傅良薛叔似章穎鄭湜樓鑰林大中黃由黃黼何異孫逢吉餘官三十一人劉光祖呂祖儉葉適楊方項安世李惠沈有開曾三聘游仲鴻吳獵李祥楊簡趙汝談趙汝譚陳峴范仲黼汪達孫元卿表燮陳武田澹黃度張體仁蔡幼學黃灝周南吳柔勝王厚之孟浩趙鞏白炎震武臣三人皇甫斌范仲任張志遠士人八人楊宏中周端朝張衛林仲麟蔣傅徐範蔡元定呂祖泰慶元三年知綿州王沆上言請令省部置籍下臨安府吏部郎黃子由上言人主不當待天下以黨不必置籍以示不廣木幾子由降去神仙通鑑林靈素侍游禁中至一閣下見碑題云元祐姦黨之碑遂獻詩曰蕪黃不作文章客童蔡反為社稷臣三十年來無定論不知奸黨是何人因得旨撤碑案此事野史多載考宋史崇寧中籍黨人榜

朝堂一刻石端禮門再刻石諸州三刻石文德殿門  
帝既親書京復自書頌天下並無刻石閣下道流之

言不足據 案蘇黃二句  
金人馬定國詩見中州集

未擎手版進名銜正士無人一例芟安得長書似方鳳  
清風終不浣朝衫

朝野類要初入仕必具鄉貫三代名銜謂之脚色崇  
觀間當書云不係元祐黨籍紹興間即云不係蔡童  
朱王等親屬慶元間加不是偽學方與銓除 又上  
天子書曰萬言書若上公侯則曰長書 方韶卿集  
方鳳睦州浦江人久於臨安以三策上陳宜中不能  
用宋亡不仕與謝翱吳思齊為友黃潛作詩序柳貫

撰墓  
銘

易地函頭事總非髑髏夜泣佛燈微死灰又煽咸陽焰

### 江表難推禍福機

翠微南征錄華岳因韓侂胄函首有詩云反漢須知  
為晁錯成秦恐不在於期感函首之事非也案岳於  
開禧元年前上皇帝書請誅侂胄及蘓師旦語最伉直  
及函首後又為此詩重傷國體蓋不肯逐浮議附和  
者也吳興掌故云翠微集華蘓字仲清著誤也朝  
野雜記侂胄既見殺已詔臨安府墓於其家先塋之  
顯親報恩寺後易地議起乃下臨安尹遣本府副將  
尹明斷棺取首命通謝使許左往金交納時詔復秦  
檜官爵 僑吳林高宗享國  
江表禍福倚伏有難明者

三班受使拆筠簾欲賦杞作美談西域凉瓜似冰雪

不勞速遞到江南

大金集禮宋使到闕於三品官班內間插高麗夏國  
於五品官班內間插先引宋使副出笏捧書至丹墀  
面殿立定閣使左下受書奏封全轉讀訖引使副左  
上露堦齊揖入闕內宣問宋皇帝躬身受勅旨訖左  
下至丹墀面殿立定禮物右入左出高麗夏國亦如  
之歸潛志宋使至金進枇杷子王庭筠詩成上喜之  
賦詩澤奏云小臣不識枇杷子王庭筠詩成上喜之  
案庭筠詩見中州集而枇杷詩不載輿地廣記唐  
地理志餘杭郡貢枇杷松漠紀聞北地西瓜圓而  
色青翠味甘脆中有汁尤冷今禁園亦有之北轅  
錄金接伴使各帶銀牌一面樣如方響  
上有著書急速走遞四字上有御押

高築猿臺靈隱宮松花蕭雪綠蘿風畫師却有拏猿手

不管霜牙射月中

梁溪集有靈隱宮詩 後邨題跋易元吉以畫猿光  
堯賜以詩案都穆鐵網珊瑚易元吉畫猿獮擇虱圖  
有東坡題則元吉北宋人或光堯跋其畫不則另有  
一人又云元吉畫二猿俱有白牙識者云母猿方有  
牙 白

春水平隄湖上下相攜早試踏青鞵花枝繞路山南北  
歸去還乘搖碧齋

尊生八牋杭人三月三日上踏青鞵 梁溪集詩雲  
深不見孤山寺風急難乘搖碧齋搖碧齋是當時湖  
船之  
名

萬松深處響秋濤  
路繞宮城氣象豪  
薦地西風一行雁  
山雲江月轉蕭騷

南窗紀談錢唐闕注子東松聲詩夢破松聲枕上聞  
睡魔夜半戰吟魂初疑夜雨連江岸乍覺寒潮上海  
門招引好風來古寺追隨月色下前村晚行欲向聲  
來處鬱鬱蒼波盡日奔皇元風雅黃子肅錢唐詩  
舟泊風林一雁聞白蘋紅蓼共思君  
月明江水多於海雨後秋山碧似雲

除却梅屏無好梅  
虞淵簿錄不須猜  
洛花總入韓園去  
越果催從項里來

北碕集梅屏賦序北山鮑家田尼菴梅屏甲京都高  
宗嘗令待詔院圖進名園記牡丹渡江先入韓相

園會稽志會稽楊梅佳者  
出項里錢唐產者遜之入貢

玉女朝天銀作粧詞臣雪宴捧彫章珠簾十二龍樓捲

柳絮吹來浣粉香

艾軒集有賀雪表又有謝雪賜宴表書畫題跋記  
宋寧宗楊皇后題畫冊云風吹醉面不知寒信脚千

山與萬山天梵瓊街三十里更飛柳絮與君看後書  
題朱銳冊賜大少保有坤卦小圓印少保即楊次山

花枝馬上蹙雙尖繡鎧非同舞袖纖亦有新詞傳禁苑

清華直欲匹香奩

滄洲集閣子詩應是君王方右武內家仙子亦知兵  
韻石齋筆談楊妹子寧宗皇后妹書法類寧宗御

府畫多命題咏其題馬遠松院鳴琴詞云閨中一弄  
七弦琴此曲少知音多因淡然無味不比鄭聲淫松  
院靜竹樓深夜沈沈清風  
拂軫明月當軒誰會幽心

柴柵牽名何太迂詩編著錄號江湖鶴山跋語題鴻寶

鍾鼎能凌薛氏無

讀書附志江湖集九卷錢唐陳思彙本朝人之詩又  
刊六十家小集皆南宋人余插架有之 鶴山集書  
苑菁華序臨安鬻書人陳思集漢魏以來論書者為  
一編最為該博案此書凡二十卷後題臨安府柵北  
大街陳氏書籍鋪刊行又刊寶刻叢編二十卷皆金  
石文跋 鍾鼎彝器款識錢唐薛尚功用敏著凡二  
十卷皆三代以來款識之文尚功手書世  
傳石刻僅存其半尚功又有鍾鼎韻七卷

千秋史法弘綱在十四經文舊目遺兩部聖言齊魯論

一編帝學古今師

宋季三朝政要理宗嘉熙元年詔國子監下臨安府刊朱子通鑑綱目禮記集說大戴禮列於學宮故

當時有十四經之目

中興館閣書錄韓愈李翱共

成論語筆解十卷王存序云此得於錢唐汪充家又

通考云魯論二十篇齊論二十二篇多問王知道兩

篇自張禹刪之斯文遂喪至南宋已難搜求矣帝

學建炎四年禮部尚書謝克家等上言以故翰林學

士范祖禹所著帝學有益治道可備睿覽案此書凡

四卷

多少官人馬上看涼衫輕拂據雕鞍昨朝曲宴需雲殿

親見官家進小冠

清波別志士大夫於馬上盡披涼衫錢唐鈔志古  
宮室考南宋大內有需雲殿雲麓漫鈔高宗時隆

祐太后遺以小冠曰此  
祖宗燕閒之所服也

內苑新營定一亭擬將射策卜文星無端竊得機關透  
造榜天翰墨有靈

三朝政要嘉熙二年廷對有邵澤攜京墨甚佳有中  
貴欲之邵無吝色中貴曰主上御苑中方建一亭名  
曰定一上曰有士人用此立說取為狀元邵得其說  
揮毫如飛上得此卷欲寘榜首時已取周坦乃以澤  
為榜眼知稼翁集放  
榜詩平地雷轟造榜天

齋廊占籍幾春秋  
紬史翻經死不休  
不向殿前喫五盞  
儘判度語羃缸頭

蠹齋鉛刀編送人失解詩紬史翻經有成約不應從此厭招邀  
武林舊事上御集英殿唱進士名狀元  
賜酒五盞餘人各賜泡飯  
知稼翁集進士入試詩  
要令瘦語題蓋白莫把元文覆醬甌  
注臨安人以點  
酒  
卷羃

翻本蘭亭自取嫌寧知博議辨尖纖  
當時最好棠梨拓  
玉枕偏誇字格嚴

後邨題跋蘭亭定武石為薛氏子竊去今都城鬻者皆薛續本案都穆鐵網珊瑚薛珣作帥刻石易去

蘭亭續考蘭亭本流傳有玉有石有棠梨板木刻者  
佳至正直記賈秋壑得一硃硃石枕光瑩可愛欲  
刻蘭亭而患其小有一鐫者以燈影感其字宛如定  
武本缺損皆全賈開宴以賞之世號玉枕蘭亭今稱  
玉版者繆也

茸衫細瑋錦韞稜蕉翠珍珍痛不勝枉自監搜諄玉牒  
愁攤小雅映秋燈

宣和遺事二帝后北狩至正定府一番官妻自稱肅  
王女珍珍已成服見太后訴舊事危學士集宋宗  
室士嗽嘗錄羣從之言號為玉牒勝談  
靖康小雅一卷紀北狩事此書通考失載

霜草稜稜健翮舒秋風獵獵海天虛南中那得巢生犬

宮禁空傳咏漱書

東園友聞北方雕作巢官司必設置守之凡三卵及出必有一狗耳上有羽毛獵時雕上飛狗則陸行所逐同至名曰鷹昔狗有縈錄臨安有人好養鷹嘗見其几間有書一帙上題咏漱二字皆飼鷹之法問所從來則曰先人在北司諸闈往來此從宮中得之

國事已荒藍貌鬼南人惟恃黑灰團蠟丸夜達中書省

只作牽絲撮弄觀

三朝政要丁大全藍色鬼貌既登寵位北兵渡江大全匿報幾誤國事遂謫竄而死又北兵渡江臨安將謀遷蹕吳潛沮之向士璧曹世雄劉整皆有功似道並欲殺之整懼以城降北遂獻言曰南人所恃惟

一黑灰團耳呂文德號黑灰團杜清獻集奏藁臣  
蚤上得呂文德蠟書以捷聞既又有告急之說御筆  
降出無甚迫急城中有恃而無恐耳後村集端平  
之初除拜一新趙南塘起散地掌內制有觀傀儡詩  
云酒闌有感牽絲戲  
也伴兒童看到明

為有宮閨識小名又聞臺閣系羣英傳來都是臨安本  
粉墨閒銷與漫評

姪侍類偶周守忠集女子之名作偶聯韻語嘉定十  
三年刻於臨安行在諸軍糧料院幹辦鄭域序自  
號錄錢唐徐光溥輯宋代名人之號淳祐丁未其友  
譚友序而刊之諸軍糧料院在漾沙坑今峨眉山  
東之  
淺山

香奩弟子舊秦風詩法精深碑版工莫效長牋怨夫聾  
徒揮老淚倚熏籠

四朝詩集云閨秀韓玉父秦人家於杭李易安教以  
詩雲麓漫鈔易安居士有投內翰綦公崇禮啟清

照啟素習義方麤明詩禮近因疾病欲至膏肓牛蟻  
不分灰釘已具嘗藥雖存弱弟應門惟有老兵既爾  
蒼皇因成造次信彼如簧之說惑茲似錦之言弟既  
可欺持官文書來輒信身幾欲死非玉鏡架亦安知  
偶俛難言優柔莫決呻吟未定強以同歸視聽才分  
實難共處忍以桑榆之晚節配茲駟儉之下才身既  
懷臭之可嫌惟求脫去彼素抱璧之將往決欲殺之  
遂肆侵凌日加毆擊可念劉伶之助難勝石勒之奉  
局地扣天敢效談嫖之善訴升堂入室素非李志之  
甘心外援難求自陳何害豈期末事乃得上聞取自

宸衷付之廷尉被桎梏而置對同凶醜以陳詞豈惟  
賈生羞絳灌為儕何啻老子與韓非同傳但祈脫死  
莫望償金友凶橫者十旬蓋非天降居圜圜者九日  
豈是人為抵雀捐金利當安往將頭碎壁失固可知  
實自繆愚分知獄市此蓋伏遇內翰承旨搢紳望族  
冠蓋清流日下無雙人間第一奉天克復本緣陸贄  
之詞淮蔡底平實以會昌之詔哀憐無告雖未解驂  
感戴鴻恩如正出已故茲白首得免丹書清照敢不  
省過知慙捫心識媿責全責智已難逃萬世之譏敗  
德敗名何以見中朝之士雖南山之竹豈能窮多口  
之談惟智者之言可以止無根之謗高鵬尺鷃本異  
升沈火鼠冰蠶難同嗜好達人共惜童子皆知願賜  
品題與加湔洗誓當布衣蔬食溫故知新再見江山  
依舊一瓶一鉢重歸畎畝更須三沐三薰忝在葭莩  
敢茲塵瀆案易安再適張汝舟竟至對簿啟在臨安作也時崇禮官翰林學士

舊說南朝三百寺猶餘兩碣未頑孱誰知千古忠姦蹟  
却在波崖泐石間

興福禪院碑淳熙七年周邦撰記劉士莊書  
廣壽  
慧雲寺碑史浩撰記樓鑰書此又稱張家寺  
熙寧

石屋題名陳襄蘓頌陳奕黃顥曾孝章蘓軾同遊熙  
寧六年二月二十一日崇咸淳臨安志蘓公題名黨

禁時已錫去今摩崖朗然後人重公之名而補刊也  
咸淳石屋題名咸淳三年九月二十八日賈似道

領客東元嘉史有之廖陸中黃公紹王庭來游子德  
生諸孫蕃世侍案此段摩崖賈名漫滅後人惡賈而  
毀之

黃鶯枝上盡情啼何處西陵路欲迷款款朱輿繞湖去

# 相君心愛白沙隄

吳越備史西陵即今西興錢王渡江以陵非古語因  
易之案此則錢唐稱西陵繆也咸淳臨安志無白

公堤所謂白公築之堤在上湖與下湖相隔處公自  
著錢唐湖石記可証今人所指之白堤即白詩所云  
綠楊陰裏白沙堤白公前已有之宋時稱孤山路故  
成化府志猶無白堤之名三朝政要賈相出乘朱  
輪輿自葛嶺至  
宮城繞堤而行

嬌女如花掩畫屏牙旗小校閉松廳新書仿出奇奇集  
更著兵門蟋蟀經

志雅堂雜鈔賈師憲嘗刊奇奇集萃古人用兵之法  
蓋自誇其援鄂之功也世傳新書曹孟德著蟋

焯經三卷相傳賈秋壑著詞頗雅馴有更  
籌帷幄選將登場諸語巖藩嘗有繪畫本

鴟彝不逐五湖雲那肯鎔金獨范君黃土搏成終是偶

沉香熟盡更誰熏

三朝政要賈似道既占湖山之勝作半閒堂延羽流  
塑已像其中元秘書志延祐七年五月中書省簿  
籍諸物有賈似  
道畫像二軸

研朱嵌墨離文似沁綠塗青銅匱如久已朝堂不設鼓  
無勞齋館有辭書

三朝政要景定五年造金銀見錢闕子其制上墨印  
如西字中紅印三相連如目字下兩傍各一小黑印

宛如一賈字 又賈似道當國置綠櫺招入告訐  
清波別志行在登聞鼓院有院無鼓以鼓在汴京茲  
不復設 三朝政要太學生上書輒累百人令臨安  
尹遂游士并削其籍諸生作捲堂文以辭先聖 太  
學在紀家橋  
今按察司署

水西雲北景蒼蒼花塢風晴月有香何似梅花裏湖好  
長留孤影照滄浪

沼水集三賢堂記乾道中移三賢於水仙王之意俛居廡下慢賢滋  
雖摘取坡公詩配食水仙王之意俛居廡下慢賢滋  
甚郡守袁韶揆得花塢一所當蕪隄正中建堂奉安  
又卽三堂曰水西雲北曰月香花影曰晴光雨色  
興觀集詩咸平處士誠  
堪羨死守梅花住裏湖

爛爛珠光散不收香煙縈郁水空流皇家寶異誰經識  
冊府猶堪按籍求

至正直記宋臨安時有以徑寸珠進御一宦官求賂  
其人不從宦官取絲絡珠於梁焚乳香熏之須臾化  
為水宦官云此非明珠乃猿對月凝視久墮淚含月  
華而結成也寶貨辨疑一卷宋時掌公帑者所錄  
凡物源產地用法皆詳述

三千上玉只焚身雲氣終虛屍氣親二十金釵共垂手  
九歌聲裏哭孤辰

三朝政要賈似道愛珍寶聞余玠有玉帶發塚  
取之志雅堂襍鈔廬方喜作秋壑記九歌

錦刻蒲桃稱異色當時諫史絕奢華後來輿論成謠詠  
玉碎琉璃號假花

中興編年淳熙中蜀貢葡萄錦却之從臺臣諫也  
佩韋齋輯聞咸淳末禁都下婦人飾珠翠悉以琉璃  
代玉民謠曰滿頭多是假無處不琉璃  
時似道當國假謂賈琉璃謂流離也

墨花零亂浣殘脂獨爾烏闌寫妙詞休話平康舊都事  
蔡奴留影傳師師

四朝詩集云南宋杭妓能詩者蕪小娟後村詩話  
汴妓部六即蔡奴也元豐中命待詔崔白圖其貌入  
禁中敏求記李師師小傳一卷臨安刊於權場中  
老學菴筆記潘子賤有題蔡奴傳神語云嘉祐間

風塵中人亦如此嗚呼戚哉則蔡奴  
留影正南宋事也潘為紹興中人

燕子帶來雙翦雨梨花老去一絲風啼痕染就紅心草

誰與金釵葛嶺東

桐江集本綿怨序云賈似道南窟猶攜所謂王生沈  
生者自隨二生天下絕色也本綿菴既殂二生再展  
入北後南還善事貴人巧伎藝拙女功  
願再驚人為妾因寫之樂府以為世戒

會向歌樓喚酒京不煩東帶款逢迎玉缸若藉菱叢佐  
秘色新來雨後晴

雲麓漫鈔都人呼酒瓶為酒京侯鯖錄有酒經晉安  
人餽酒致書云或一經或五經他邦人不知其義聞

送五經東帶迎於門 又青竈器李王  
秘色為最近臨安亦自燒之殊勝於前

自是清才繼玉瀾鸞釵劃損綠琅玕桃墩總有傷心淚

勒斷筋弦不忍彈

斷腸集朱淑真錢唐下里人世居桃村工為詩嫁為  
市井民妻不得志歿宛陵魏仲恭端禮輯其集名曰  
斷腸錢唐鄭元佐如注分為十卷刊行有臨安王唐  
佐傳今失之世所傳二卷田藝衡序者繆也 四朝  
詩集云淑真海寧人文公姪女 玉瀾堂記朱棣字  
逢年文公叔父少負才不得志晚年節愈厲而詩益  
高因夢名堂曰玉  
瀾尤延之為序

我曾把讀梁溪集五世三公喬木材此日君臣咏魚藻

湖園親駕翠龍來

梁溪集尤袤延之著凡五十卷 萬柳溪邊舊話先  
莊定公築園臨安之西湖度宗嘗幸其堂御筆題楹  
間曰五世三登宰  
輔奕朝累掌絲綸

宮袍掩映牡丹緋  
裊裊鞭絲出禁闈  
寄語香街探花使  
今年春榜號龍飛

朝野類要聞喜宴日選年少二人先到瓊林折花迎  
狀元吟詩此唐制今人謂第二名為探花者非也

又每遇主上即位第一  
次選士謂之龍飛榜

蕊珠淡墨尋常事尚見同班兩錄留千古香名磨不滅

後來應號小瀛洲

紹興十八年王佐榜同年小錄寶祐四年文天祥榜  
登科錄此二錄後有翻刻為有朱文公及文信國耳  
文公名在第五甲第九十人字元晦小名沈郎小字  
季延信國第一甲第一名字宋瑞小名雲孫小字從  
龍案後村集有甲申同班小錄序即題名小錄也  
水天閣集小瀛洲石簣為商半堊題以其地近依光  
堂南宋進士  
題名之處

十里平湖波浪深大魚成挹小魚針放生不禁魚兒活  
贏取豪家幾笏金

金石志有高文虎德生堂碑記案慶元中安撫趙師  
翼請用天禧故事以西湖為放生池則通西湖皆稱

放生池非今一隅之地也德生堂在石角橋今昭慶之側而淳熙虞公謂堂在湖心寺指今之放生池殊不知宋時湖心寺即今之湖心亭舊志多訛外余修邑志改正之夢梁錄金魚有銀白玳瑁等色錢唐門外多蓄養之入城貨賣名魚兒活

羅屏掩處添三尺蘇幕遮來抵一重若使藏鉤勝隔座為因關草代分峯

雲麓漫鈔紹興末中官以小竹編聯籠以衣畫風雲鷺鷥名曰畫絲好事者大其制施於酒席或野次可以障風易其名曰挂愚又言出於金中目曰詬私言遮蔽可詬私事然言為詬南人方言非北語也

玉龍萬捲發靈虛畫裏濤江壯帝居只道鳬車迎伍相

# 不知水馬弔三閭

七修續藻葉南屏家有宋宮觀濤圖樂圖李嵩畫見  
張憲玉筍集 稊米集詩江風獵獵吹紅旗舟人結

東誇水嬉又云飯筒角黍纏五綵楚俗至今猶未改  
日暮空歌誰在斯不見三閭憔悴時案周紫芝此詩  
言錢唐江中競渡也他志只言在西湖耳紫芝官臨  
安久其言有據 尊生八牋南方競渡使舟輕利謂  
之飛鳧又曰鳧車有詩  
云水馬浮江弔屈魂

南朝剩有虞公劍能比金源水造刀待與青城間鼓柶

# 西風一葉泛離騷

朱存理鐵網珊瑚宋相虞雍公古劍傳於其八世孫  
堪處倪瓚作古歌 志雅堂襍鈔伯幾家有篋刀乃

大金水總管所造上有滲金錫水造二字直鈔十鉸  
倪雲林集堪字克用僑居錢唐四壁山有鼓枹稿  
桐華煙細不須多案上牀間置幾螺怎得清芬如帝子

請將墨史試研摩

墨史澤州胡景純取桐油燒煙製墨名桐華烟 又  
南朝皆稱墨為螺 又趙令衿宋宗室封安定郡王

善製墨子子覺孫伯康皆傳其膠法  
銘曰超然清芬如在超然令衿自號

春宴遺風自曲江水晶雲殿百花牕熒煌燈火錢唐夜  
十隊酣春賽不降

朝野類要行都西湖寒食前排辦春宴用舟載伶妓  
此唐曲江之遺自諸王公卿及六曹郎排日宴會並

是京尹館伴 天籟集 西湖詞十里水晶雲殿 夢  
梁錄湖船有百花十樣錦等名 霞外集詩店舍喧  
譁徹夜開熒煌燈火映樓臺歡游未曉不歸去早有  
元宵氣象來 剡源集咸淳德祐中杭有善歌者十  
人各以才色聞  
天下兵後散失

襜車小隊出通津  
艷紫文羅半隱身  
縱使凌波步羅襪  
不爭水路蹙絲塵

清波別志 婦女步通衢以方幅紫羅障蔽半身謂之  
蓋頭凡貴游出令人持鍍金水罐子前洒方過車名  
曰水路此猶汴  
京之遺風也

井汲甜瓜分外清  
十街三市幾番更  
水銀不願天宮賜

只願官除竹木征

夢梁錄六部前有甜瓜井 清波別志臨安人移屋  
以傍井處為佳 中興編年紹興二十六年七月臨  
安雨水銀 三朝政要紹  
定五年臨安蠲竹木之征

潮拍椿濬卦畫齊蛟宮荒怪漫然犀鱗蟲水母差堪異

更詫毛羣膺肭臍

吳越世家疑辯錢武肅築塘以木立於水際去岸二  
丈九尺立九木作六重象易既濟未濟卦由是潮不  
能攻 龜溪集錢唐水母詩眼中水怪狀莫名出沒  
沙嘴如浮嬰渾沌七竅俱未形塊然背負羣鰕行  
清波別志臨安小民往江口見潮退有一異物褐色  
有毛有牙有脚有鼻有耳骨軟似不任持重三四十

斤或名為海狗後有貴人  
詢其形狀曰此膾胸臍也

五酸封蒸按舊經亭童取汲水清渟河陽風月依然是  
況有如花儂酒伶

宴公類要江南五酸酒 梯米集論麴院書酒與麴  
相須而成在乎擇水之佳者西湖之水清甘如飴其  
外則用龍山鴻雁池水南外用巡檢司大井水江漲  
北外用下湖水 夢梁錄臨安府照檢司管城內外  
諸酒庫每年清明前開煮擇日開沽呈樣各庫預貼  
告示官私妓女社隊鼓樂謂之迎煮 汴都記酒家  
望上書河  
陽風月

湖目全憑水結叢琉璃地上旱蓮紅鴛鴦豈是能言鳥

啞啞經魚粥鼓中

北磬集白蓮花寺在風篁嶺下肇法師誦經於此蓮  
生陸地駕央亦解誦經湖目蓮子見皮日休詩

一生難報狀元恩日月精光吐復吞不信漁陽搥鼓急

回頭無路哭修門

文信公傳伯顏駐軍皋亭山公往議和伯顏以危言  
折之公謂宋狀元宰相所欠一死報國耳文山全  
集鹿鳴宴詩有云二宋高科猶易事兩蘓清節乃加  
榮囊書自負應如此肯遜當年福正平自注提舉李  
愛梅迪舉送弟璧同薦是年及第  
指南錄序皋亭山距修門三十里

寒鴉啼上萬年枝一片荒坪月去遲滾滾蠻潮等閒過

蓬葩江上弔鴟羣

江月松風集故宮詩寂寞萬年枝上月夜深猶照舊  
宮牆 滄洲集羅公升之大父從文丞相於閩廣兵  
敗不食死公升傷大父死節而宋祚已  
終乃作弔晉濤賦 蓬葩見劉乂詩

夢斷羅衾冷似冰  
嗶嗶紅喙語雕棱  
木波不斷幽人怨

梧葉聲中蟋蟀燈

乾坤清氣集瀛國公鸚鵡詩毛羽自然可數仙禽不  
受凡籠銜得梧桐一葉中含無限秋風 湖山類集  
瀛國公為僧  
號木波講師

投老湖湘更不歸  
哀江南後淚空揮  
傷心釀酒城南路

親見鸞皇作隊飛

金臺集水雲北歸後往來匡廬彭蠡間若飄風行雨  
人以為仙畫其像祀之 宋遺民錄謝翱賦續琴操  
哀江南四章為錢唐汪元量作也按水雲集元量以  
琴供奉扈駕北行既而以黃冠放還德祐主贈之以  
詩宮妃屬和以勸君更盡一杯酒西出陽關無故人  
分韻王清蕙陳正淑黃慧正何鳳儀朱靜正葉靜慧  
孔清正鄭惠正方妙靜翁懿淑章妙懿蔣懿順林順  
德袁正淑又有章麗正袁正正金德淑總十七人其  
詩並見集中余家藏元量水雲  
集及湖山類藁二本互有不同

千古靈胥氣未銷青霓曳曳下雲翹巫師但擊靈鼉鼓

更有何人賦大招

金龍山聖蹟記謝公緒會稽諸生居錢唐安溪謝太后姪也三宮北行公授安溪死門人葬於鄉之金龍山明太祖呂梁之捷神顯靈遂勅封金龍四大王立廟於黃河之上余修錢唐邑志補入忠節傳

傳道尋春四壁還江清湖潒有無間元和圖牒分明見何處沉霾界石山

朱存理鐵網珊瑚倪瓚題虞堪八世祖雍公古劍歌序云余訪青城山樵於錢唐之四壁山案此山之名咸淳志不載後來作志者均失之元和郡國志錢唐載二山一靈隱一界石今界石之名宋志已無今不可考

故事全憑共討論江關老去鳳皇門華胥醒後黃梁熟

便話南柯也不根

松隱集德壽宮帖子向晚天中月一痕春陽先到鳳  
皇門 東京夢華錄幽蘭居士孟元老追叙東京舊  
事書成於紹興丁卯自為序淳熙丁未浚儀趙師俠  
後序 夢梁錄吳自牧自序云昔人卧一炊頃而平  
生事業別歷皆遍矧時異事殊城郭苑囿之富風俗  
人物之盛焉保其常緬懷往事殆猶夢也因名夢梁  
錄 養蒙集南柯錄序御前提點錢唐劉君久居禁  
近逮事皇元不失故步退食多間追記舊聞名曰南  
柯錄蓋紀曩日繁華事也  
案此編失傳名亦無考

名集猶傳六十人湖雲江月話津津而今花柳新題處  
况是欣逢寶曆春

南宋六十家小集錢唐陳思彙集本朝人之詩集尾  
書刊於臨安府柵北大街陳氏書籍鋪者是也題曰  
韋賢小集鄱陽洪邁野處類稿二卷臨川危正巽齋  
小藁一卷螺川羅與之雪坡小藁二卷滄洲高九萬  
鞠礪小集二卷臨江鄒登龍梅屋吟一卷盱江余觀  
復北憲詩藁一卷開封趙崇錦鷗渚微吟一卷古徐  
朱南杰學吟一卷古枯王琮雅林小藁一卷芳庭斯  
植采芝集二卷錢唐陳起芸居小藁一卷雪川吳仲  
孚鞠潭詩集一卷龍泉沈說庸齋小集一卷唐栖釋  
永願雲泉詩集一卷金華王同祖學詩初藁一卷四  
明陳允平西麓詩藁一卷錢唐何應龍橘潭詩藁一  
卷柯山毛珣吾竹心藁一卷臨江鄧林皇華曲一卷  
壺山許棐梅屋詩藁四卷清源胡仲參竹莊小藁一  
卷三山陳鑒之東齋小集一卷浮玉施樞芸隱橫舟  
藁一卷又芸隱倦游稿一卷建安徐集孫竹所吟藁  
一卷盱江吳汝弢雲卧詩藁一卷古汴武衍適安藏

拙餘藁二卷四明高似孫疎寮小集一卷建安葉紹翁靖逸小集一卷河陽張弋秋江烟草一卷建人張至龍雪林刪餘一卷金華杜旃癖齋小集一卷廬陵劉儼倫招山小集一卷玉溪嚴粲華谷集一卷吁江黃文雷看雲小集一卷汴人趙希樞抱拙小藁一卷丹陽葛起耕檜庭吟藁一卷碧澗利登散稿一卷廬村薛岫雲泉詩一卷山陰葛天民無懷小集一卷錢唐余桂漁溪詩藁一卷又漁溪乙藁一卷長沙劉翰小山集一卷大梁張良臣雪窻小集一卷邳州張蘊斗野稿支卷一卷南豐黃大受露香拾藁一卷三山林希逸竹溪十一藁一卷長樂教陶孫臞翁詩集一卷建安朱繼芳靜佳龍尋藁二卷閩人陳必復山存存藁一卷長樂林尚仁端隱吟藁一卷剡溪姚鏞雪蓬藁一卷福唐劉翼心游摘藁一卷春陵樂雷發雪磯荒藁一卷茗川宋伯仁雪岩吟草一卷天台戴復古石屏續集四卷笠澤葉茵順適堂吟藁一卷廬陵

劉過龍洲小集一卷石塘林同孝詩一卷荷澤李夔  
梅花袖一卷又翦綃集二卷鄱陽姜夔白石道人詩  
一卷臨川李濟蒙泉詩一卷陽穀周文璞方泉詩一  
卷廬陵沙門紹嵩江浙紀行集句七卷宣城吳淵退  
安遺藁二卷永嘉薛師石瓜廬詩一卷又陳起宗之  
編前賢拾遺五卷又編增廣高僧前後集四卷此編  
流傳絕少特著其日如右石屏集詩聖  
朝開寶歷又云江山一夜雨花柳九州春

南宋襟事詩卷二

欽定四庫全書

南宋禱事詩卷三

仁和陳芝光撰

元朔朝正海國來聽雞探蠶曉光催千官鵠立瞻天表  
萬歲聲長繞殿雷

夢梁錄元旦禁中景陽鐘罷百官皆冠冕朝服諸州  
進奏吏各執方物之貢諸外國正副賀正使隨班入  
賀上御正衙禁衛人高聲嵩呼聲甚震名為繞殿雷  
百僚俱鞠躬聽宣制曰履茲新慶與卿等同斗野  
藁除夕詩京國逢除夕栖遲髻欲霜春聲生爆竹歲  
色動椒香戒睡聽雞蚤占詩探蠶忙燭花頻送喜兒  
女笑  
闕堂

金釘彎橋白玉裝幽奇全勝偉觀堂假山勅賦壺天景  
又見香蘭設御牀

癸辛雜識德壽宮有橋乃中秋賞月之所橋用吳璘  
所進階石甃之瑩徹如玉以金釘鉸橋下皆千葉白  
蓮花水南岸宮女童奏清樂水北岸教坊樂工吹笛  
者二百人方輿勝覽中和堂太上光堯皇帝御書  
謂斯堂偉特之觀無媿上都薰風南來我意雖暢願  
與衆人共之後改為偉觀堂海野詞侍宴德壽宮  
應制賦假山調寄醉蓬萊云向逍遙物外造化工夫  
做成幽致香靄壺天映滿空蒼翠聳秀峯巒媚春花  
木對玉階金砌方丈瀛洲非烟非霧恍移平地況值  
良辰宴遊時候日永風和暮春天氣金母龜臺傍碧  
桃陰裏地久天長父堯子舜燦綺羅佳會一部仙韶  
九重鸞仗年年同醉宋史新編理宗在位久董宋

臣盧允升作芙蓉閣香蘭亭宮  
中進倡優傀儡以奉帝遊宴

翠寒堂上賞春風壯麗由來絕代工  
小憇肩輿高柳下

### 酴醾飛雪壽杯中

二老堂襟志淳熙七年三月十八日車駕詣德壽宮  
恭請太上皇帝壽聖皇后於是乘輿至大內於凌虛  
閣下三面設酴醾牡丹花皆層級高數尺一面垂簾  
設樂酒三行太上皇帝壽聖皇后聯步輦以行今上  
亦步輦從至翠寒堂棟宇顯敞不加丹雘太上指示  
曾觀云營造何如觀奏曰宏壯精巧二者兼之今上  
即曰凡此鉅材一椽已上皆出太上皇帝所賜酒復  
數行至水堂中路石橋上肩輿少憩面對酴醾花架  
高柳參天酴醾引蔓垂梢而下其長袤丈  
芳菲照坐馥郁襲人上亦滿引勸酬者三

柳陰橋影步忘歸樓傍雙清碧四圍消得騷人奇絕想  
荷花欲翦嫁時衣

庸齋小集西湖獨步詩小立背橋影緩行隨柳陰  
方壺存藻秋日飲錢唐門外雙清樓詩西湖日日可  
尋芳樓上憑闌意未忘斫取荷  
花三萬朵作他貧女嫁衣裳

老木雲煙望裏平小春橋外水風聲猶餘圖畫雙杉古  
誰把青龍指下生

蛻菴集鳳山詩哀草寒烟老木風南朝佳氣落秋空  
余忠宣集九里松詩言從天竺寺自度小春橋

傳與礪集有題李道道畫靈隱道中二杉圖 犁眉  
公集題松雪松圖注云松在白塢詩云趙公拈筆作

古松平地躍出三青龍又云前朝美人闌州  
處猶有當時數株樹 案小春梅即行春橋

醑醑如雪酒初醒修竹風搖著作庭曾說牙籤紛萬軸

不如丹筆寫盤銘

梅溪集有秘書省道山堂看醑醑詩 又題秘書省  
後圃修竹詩不俗更嫵俗風枝時拂牆青青映藜燭  
細細禰若香勁節老方見清陰寒影藏蕭疎似吾輩  
味向靜中長 藤陰劄記光宗讀朱子編次盤銘丹  
書語朱子曰宮中嘗讀之其  
要在求放心朱子頌首謝

沙河燈火接星關洞裏神龍去不還部伍亭前空綠草

戴高祠畔賸青山

然堂集初到臨安詩風際莞弦朝病酒雲中樓閣夜  
焚香十年一夢沙河路獨步春泥覺燕忙抱拙小  
藁臨平洞兩洞深如許神龍此莫居然堂集詩部  
伍亭前歸路鳳皇山下蕭齋我自無聊不住君如有  
興重來晞髮集吳山謁祠詩吳山坊項戴高祠禁  
地淒涼江水悲却是北人題記壁迤南耆舊獨無詩  
思陵筆格入鍾王搜得麻牋僅九行試看當年題識在  
磁藍籤色逼靈光

續書譜高宗書法出入鍾王更輔以六朝風骨自成  
一家松雪齋集王獻之洛神賦十三行二百五十  
字人問只有一本是晉時麻牋紹興間思陵力購僅  
得九行一百七十六字至賈似道復得七十四字  
裝潢志宋徽宗金章宗多用磁藍紙泥  
金字貼籤殊臻壯偉之觀高宗亦用之

梅竹勺將扇面攤江南情思落齊紈可知青紙為承萼  
儉德猶留後世看

夢梁錄夜市有崔官人將字攤梅竹扇面兒在五間  
樓前大街坐鋪玉山璞葉題宋高宗意思便面詩  
當朝山色尚烟嵐近侍承恩罷早參邊奏不來春殿  
寂自將情思寫江南嬾真子紹興三年六月明州  
阿育王山住持淨曇以宸奎閣所藏仁宗御書詣行  
在所獻凡五十三軸又有團扇三柄皆以青牋紙為  
承萼制度極草草大  
哉仁宗之盛德也

和王世澤有文孫猶記當時雲洞園搜輯九經奇字在  
更饒六帖與評論

六帖補呂午序云楊伯嵩號泳齋和王曾孫輯六帖  
補最精核往與予同仕於朝出示此編命為之序泳  
齋又作九經  
補韻行於世

天竺山西巖谷深松蘿交翠自成陰老禪慣與猿公戲  
攫果時來樹下吟

帝都賦傍西深入巖谷益秀竹所吟藁下竺看猿  
詩渴泉飲罷過別枝株守山林得便宜伸手攫擊野  
僧果貴游玩  
弄如兒嬉

一山桃李占繁華武庫旗翻寂不譁回首蓬萊雲氣近  
殿司營是太師家

龍洲集同郭殿帥遊鳳山詩  
魚纖小雨久於梅喜得  
新晴亦快哉  
五色波光麗  
鴉鵲十分雲氣近  
蓬萊旌  
旗側畔宮牆轉  
戈戟叢中武庫回  
走馬看花生怕晚  
果然桃李一山開  
揮麈後錄蔡元長  
少年鼎貴建  
第錢唐極為雄麗  
全占江湖山林之  
勝  
今行在殿前  
司是也  
案殿前司在鳳皇  
山大內側  
今呼御校場  
纔過燒燈小雨收  
玉梅飛上玉搔頭  
湟槃勝會花生日  
看畫長明寺裏遊

斷腸集元夜詩  
壓塵小雨潤生寒  
雲影澄鮮月正圓  
十里綺羅春富貴  
千門燈火夜嬋娟  
香街寶馬嘶金轡  
輦路輕輿響翠駟  
高掛危簾凝望處  
分明星斗下晴天  
夢梁錄杭城大街  
春冬撲賣玉柵小  
毬燈奇巧玉柵屏  
風捧燈沙戲走馬  
燈鬧蛾兒玉梅花  
金橘數珠糖水魚  
龍船兒梭毬香鼓  
兒等物又云仲春

十五日為花朝節崇新門外長明寺建佛涅槃勝會  
羅列幡幢種種香花異果供養掛名賢書畫設珍異  
玩具觀者紛  
集竟日不絕

六日七分添線處五更三點賀冬時地瓶移插梅花吐

繡疊簾旌喚舞兒

詩林韶蒨周必大云冬至與胡邦衡小語端誠殿下  
邦衡舉易緯六日七分之說輒用子美五更三點為  
對霞外集至節即事詩天街曉色瑞烟濃名紙相  
傳盡賀冬繡幕家家渾不捲呼盧笑語自從容昨夜  
梅花已報春地瓶移插更精神酒酣纖手爭來折鸚  
鵡回頭不敢喚已有紗籠照舞兒喧喧鼓笛自相隨  
誰家院落來呼喚門外天明也不知簾旌疊疊繡蛟  
綃遮護香風不放消却恐酒闌先睡去預教小玉問

明朝 案馬霞外自序云年  
少承平之樂誠不易逢也

宋家南渡擬東遷為有遺經大道傳不比五山蕪十刹

### 崇儒但賦北山篇

勿軒集周東遷而夫子出宋南渡而文公生世運升  
降之會三綱五常之道所寄也 又南渡初文定胡

公造行都有以程氏之學盛行為言公愀然曰吾以  
程氏之學不行為懼何言盛耶 梅村集宋元以來

浙東西分立五山十刹而靈隱居其最 仁山集北  
山之高一篇美咸淳天子謂其能繼理宗師賢而聘

何夫子也何即

北山先生名基

章公太學原奇士周子兵樞亦勝流天下何曾有鵬卵

人間可惜重魚頭

卷三

齊東野語外大父文莊章公少入太學為集正嘗置酒揭饌單於爐亭品目多異其間有鵬卵者最奇大如瓜片切鉅釘大盤中衆駭愕不知何物其法乃以鳧彈數十黃白各聚一器先以黃入羊胞蒸熟次復入大猪胞以白入之再蒸而成按章名良能寧宗時登政府二老堂襍志紹興辛巳予為秘書省正字同館王十朋望見周麟之樞密目為魚頭公問其故云前歲為大金哀謝使金主喜之享以所釣牛魚非舊例也樞公糟其首歸獻於朝故有此號金人甚貴此魚直與牛同海陵集予憩燕山會同館有梁大使者先朝內官也入館傳旨賜金瀾酒二尊銀魚牛魚二盤演繁露牛魚背長鱗硬頭有脆骨重百斤即南方鰣魚也

夢兒亭下蘚紋青更著佳名謝屐亭誰賦池塘春草句  
只嗟五字對山屏

靖逸小藁登謝屐亭贈行之詩君家靈運有山癖平生費却幾緡屐從人喚渠作山賊內史風流定誰識西窗小憩足力疲夢賦池塘春艸詩只今屐朽詩不朽五字句法誰能追自注云亭在天竺 崇西湖志有夢謝亭  
無謝屐亭

龍眠古器寫形新骨董流傳入要津六十卷中彙鼎字  
不知曾否辱狂秦

揮麈錄李伯時自畫其所蓄古器為一圖舊在畢少董處少董死迺歸秦伯陽燔 學古編云博古圖六

十卷紹興間

本今無矣

黃羅封麵賜頻叨德大王侯始食牢夢裏紅衣有歌句

普門何必更相遭

全芳備祖蘓公詩註大內當麥熟時以黃羅帕封賜百官外題曰新麵或云以蜜漬尤佳今內廷猶仍此制墨憨齋笑纂翟公巽紹興初為參政自奉過薄謂客曰德大於天子可以食牛德大於諸侯可以食羊所進皆草具夸堅別志杭人有中麥毒夢紅衣孃子悲歌有一丸蘆服火吾宮之句咸淳臨安志上天竺觀音祈夢極靈兩浙進士類試者恒往焉多以食物著驗

緝熙小殿研山排御墨流香記損齊天語微聞先八法

# 正書派別出垂釵

輟耕錄葉世英造德壽宮墨葉邦憲造復古殿墨劉士先造緝熙殿墨志雅堂禔鈔高宗御書損齋二大字并損齋記後有左僕射沈該以下聯名法書通釋宋高宗云士於書法必先學正書以八法皆備不相附麗蓋篆隸之餘風

## 五柳園前柳線低 新開門外草痕齊 若從新路看花去 一片紅隨碧玉蹄

都城紀勝新門外五柳御園咸淳臨安志五柳園在金剛寺北按即今之板兒巷內也又云走馬塘在艮山菜市門外地平坦可馳馬故名舊有花柳號城東新路

鄂字書成壯氣存臨安何處望中原蘆川亦有英雄語  
禾黍西風鼓角喧

揮塵新譚有請仙者箕書一詩云百戰間關鐵馬雄  
尚餘壯氣凜秋風有時醉倚箕山望腸斷中原一夢  
中後大書一鄂字始知為武穆也蘆川詞賀新郎  
送胡邦衡待制赴新州云夢繞神州路悵秋風連營  
鼓角故宮禾黍案張仲  
宗以此詞忤秦檜除名

活水穿田一徑微麥潮化蝶作團飛蟠龍舞鳳盆花樣  
多向都城賣却歸

西麓藁馬嘜道上詩閑拖瘦竹筇獨步馬嘜東鳥影  
青山外春愁碧樹中麥潮風化蝶櫻熟雨生蟲莫向

溪頭去溪頭多落紅 斷腸集馬嘔詩一啖芳草碧  
芊芊活水穿花暗護田蠶事正忙農事急不知春色  
為誰妍 夢梁錄錢唐門外東西馬塍諸園皆植怪  
松異檜奇花巧果多為龍螭鳳舞之狀每日市於都  
城

石八郎祠社鼓鳴龜兒井畔聽溪聲千林吹落梅花雪  
一段清愁畫不成

咸淳臨安志安樂山在錢唐下有石八郎祠龜兒井  
在西溪覆以石龜穴其背以汲 雪窻小集過西溪  
詩 屨畫層波蕙艸荒冷雲客雁兩回皇  
梅花到得吹成雪盡是清愁不是香

侍讀清才進美譽一筒散卓拜中書叢奎自愛屠希手

入貢澄心紙不如

渭南文集紹興之間有筆工名屠希者嘗從駕四方皆貴希筆一筒至千錢晁侍讀以道作詩稱譽之六研齋筆記謝堅知徽州於理廟有椒房之親貢新安四寶澄心堂紙汪伯立筆李廷珪墨羊關嶺舊坑硯

鍛銀枉為問工儔帶格曾傳號笏頭不信還來玉色肚可能勝得紫雲樓

瑯琊漫鈔孝宗乾道中有以銀鑲獻於朝上命守臣詢究且將名冶工即禁中鍛之帶格凡三十二種其首為笏頭一字執政佩之至鍛銀鑲銅各有名號宋稗類抄王荆公受賜玉帶號玉抱肚紹興中王

之曾孫璿復進入禁中 格古要論王佐紫雲樓金帶考太宗得巧匠親督視於紫雲樓下造金帶得三十條以一賜曹彬一以自御餘皆貯庫號鎮庫帶封錫甚嚴至徽宗以賜童貫諸人欽宗復追還庫高宗紹興十三年有客來自海外忽出紫雲樓帶蓋欽宗取追不及者上出四鈐示岳珂其金紫磨地光艷溢目其文作醉拂蘇人皆突起長不及寸眉日生動其華紋則又六七級鏤篆之精若人鬼神

懷蘇何處覓芳叢採壁擎珠繡戶中休向酒邊尋搭子  
京塵空度杏花風

嘉禾百咏註懷蘇亭在禾城東宋時建與蘇小墓相望故名 江行襍錄京都不重生男凡生女則愛護如捧壁擎珠甫長則隨其姿質教以藝業因備士大夫採擇 袖中錦京師婦人美者謂之搭子陋者謂

之七蓋搭子者女傍著子為好字七字不成女字謂其不成婦女也 存餘堂詩話嘗見宋刻一詩云客懷耿耿自難寬老傍京塵更鮮歡遠夢已回窻未曉杏花風度五更寒因讀渭南集乃知其都在都下作也

都亭館伴禮殷勤向冷泉亭坐夕曛無柰西湖銷滴水

筆端驕語記煙雲

方輿勝覽都亭驛在候潮門裏國信所北使至闕先遣館伴使賜御筵於班荆館明日始至都亭驛又明日入見見之二日與伴使皆往天竺寺燒香上賜沈香乳糖齋筵酒果次日至冷泉亭呼猿洞而歸中

州集王兢奉使江左讀同官蕭顯之西湖行記詩雲烟濃淡費臨摹行記看來即畫圖雲夢不妨吞八九

筆端滴水  
了西湖

平章廟記筆穠纖却費青珉片片劉秋壑一生珍玩在  
右軍小影閉瑤函

志雅堂襟鈔廖羣玉刻王楠所作賈氏家廟記王忠文公集玉枕蘭亭跋云此本後有右軍小像題曰秋壑珍玩

白石方泉擅賦才西湖寺古共裴回綺牀熏陸多生願  
得見金銅佛塢來

方泉集姜堯章金銅佛塢歌白石招我入書齋使我速禮金塗塢我疑此塢非世有白石云是錢王禁中物上作如來捨身相飢鷹餓虎紛相向拈起靈山受記時龍天帝釋應惆悵形模遠自流沙至鑄出今回

更精綴錢王納土歸京師流落多在西湖寺錢王本是英雄人白蓮花現國主身蛇鄉虎落狗脚朕何如紅袍玉帶稱功臣天封圻開即退聽兩浙不聞笳鼓競歸來佛子作護持太師尚父尚書令一枚傳到白石生生今但有能詩聲同袍秦外鉅師兄哦詩禮塏作佛事同喫地爐山芋羹何曾薰陸綺牀供但見相輪銅綠明哦詩禮塏猶未畢蘆葉低飛山雨溼

喜生拍板宣孃笛唱賺勾欄盡有名薄媚六么官本外  
新添三笑月中行

武林舊事丁未年撥入勾欄弟子嘌唱賺色施二孃時春春時住住徐勝勝朱安安陳伴伴等又陳宣孃笛陳喜生拍又官本襍劇段數爭曲六么鞭帽六么王子高六么崔護六么鶯鶯六么女生外向六

么請客薄媚錯取薄媚傳神薄媚鄭生過龍女薄媚  
柳穀大勝樂霸王中和樂夢巫山彩雲歸風花雪月  
釵宴瑤池釵夜半樂釵王崇道休妻李勉負心鍾馗  
釵王魁三鄉題襪孝店休姐秀才下醋播風流藥三  
笑月中行 案其名甚多聊摘二  
三於此此即元人院本所自起也

蟹黃水不產西湖和樂樓前妓喚酤借問風流趙夫子

郎官還似酒監無

清波襟志泰州雪酤著名惟舊周州治井蟹黃水紹  
興間呼匠至都下用西湖水釀成頗不逮 吹劍錄  
趙鞏監昇陽宮酒庫北使至問趙夫子今何官館伴  
問何人曰趙鞏其皇帝清問下民賦吾州後生以為  
矜式呼趙夫子館伴曰今為郎官即日除司封郎中  
夢梁錄南庫元名昇陽宮煮界庫在社壇南新界

庫在清和坊南酒樓扁曰和樂諸庫皆有官名角妓設法賣酒此郡風流才子欲買一笑則徑往庫內點花牌惟意所擇

南人養馬不知名馬券傳來為習兵嘆息銷沉熊虎氣  
八哥空策蹇驢行

香溪集南人習水而便舟不熟銜轡雖蓄馬無能名其駕若駿也金石林時地考杭州有宋刻馬券碑赤城集陳孚鳳皇山詩故國盡銷熊虎氣荒山空帶鳳皇形勿軒集賈相葛嶺行有云望塵拜者頌元老伊尹周公所不如豈知一  
旦事瓦裂銀鐙鐵鐙載以驢

莫問仙巢何處亭雲濤尺五鮮人經鳳城歸去鍾聲急

# 紫水如霞冷翠屏

詞海遺珠宋理宗書仙巢吹香亭五字有詩云放鶴  
去尋三島客任人來看四時花亭為仙巢鍾尚書開  
居之地今碑在嶽麓山下蒼筤谷 江湖長翁集題  
趙景安尺五雲濤一亭尺五亭云山亭縹緲五雲連  
雲濤云坐看銀山捲壞雲 韋齋集西湖詩有云喚  
人歸去城鍾急觸處相親嶺月彎 太平寰宇記錢  
唐古泉亭有  
紫水如霞

海門樓櫓散煙塵空憶神州舊日春一自杜鵑啼不歇

## 高峰叫月有孤臣

治世正音甘瑾讀文丞相傳詩有云樓櫓海門西日  
暗劍歌江介朔風寒 又甘瑾錢唐懷古詩神州未

復英雄老王業偏安歷數迭萬騎星屯潮捲夕六宮  
雲散草生春天地間集家鉉翁詩曾向錢唐住聞

鵲憶蜀鄉不知今夕夢到蜀到錢唐咸淳集湖上  
詩一望湖光鏡而平暮鴉過盡斷霞輕狂來飛上高

峰頂趺坐松

柯蚪月生

駕頭不出簾垂畫魚鑰初開肅綺寮閒却蘇堤芳草外

游人題字上芭蕉

愛日堂藜鈔駕頭舊以一老宦者抱繡裏杭子於馬  
上高廟時亦然今乃代以閣門官不知自何年研

北襟志云故宋宮中用魚鑰降魚取匙降匙取魚古  
制也順適堂吟藁蘓堤詩參差臺榭無餘地襟脊

輪蹄了四時梅屋詩藁正珠園詩芭蕉葉上題詩  
字雨後看來半不全餘濕未勝濃墨補且攜卮酒到

花前

福嚴水曲漾金沙靈苑清鐘客憶家香骨藏埋問逋客

詩魂容與伴梅花

西湖淨社錄劉基福嚴寺硯記仁和縣北三十里有溪曰義溪乃故宋嘉定中有陳氏名迴者廬於溪上後捨身為浮屠名其廬曰福嚴皇慶二年賜額為福嚴寺 亞愚江浙紀行集句題靈隱云幾因留我宿吟到五更鍾 剡音高九萬拜林和靖詩玉面香骨老雲根占斷孤山水月村 元詩體要徐秋雲詩憶別錢唐第幾春舜江春水落如雲小樓吟倚孤山月只有梅花可寄君 漁溪集延祥觀詩御園自有逋梅在約束遊人莫肯閒

難教騎項便為釐意氣沖霄吐白霓誰道閣中頻賜酒  
那知膝底著留犁

瑯琊代醉編朱子云舉世無忠義氣忽自施全身上  
發出來此論足慰忠魂於地下矣續綱目書施刺秦  
檜不克而死亦本文公遺意近有人曰今之岳廟鑄  
檜像縛於門外亦當鑄施像坐於檜上持刀斫之庶  
為得也野客叢書秦檜自遭施全見刺之後常獨  
處一閣奴僕非召不得入會疾三衙楊存中成閔趙  
密往問召入款語久之言及近日表勲酒頗佳表勲  
賜酒名也各贈兩器自攜出室亦見駕馭之術朱  
子語錄秦太師死高宗告楊郡王云朕免得膝褲中  
帶匕首何孟春曰縛膝下褲脚今日婦女下體之飾  
豈當時男子亦或著  
膝褲耶騎項見漢書

蟲篆初來出野田樂章親製貫奎躔還勞十八章親賜  
筆意何如玉潤妍

鞠堂野史紹興五年春永興軍田夫段義耕得玉璽  
上於尚書禮部以爲秦之傳國璽其文曰受命於天  
既壽永昌詔與禮部翰林祕書御史太常官驗定集  
議方員二寸半印文深琢如碑字背白而地紅也字  
畫乃蟲篆也奎章錄光堯當內修外攘之際尤以  
文德服遠至於宸章睿藻日星昭垂者非一紹興二  
十八年將郊祀有司以太常樂章篇序失次文義弗  
協請遵祖宗故事親製祭享樂章自郊社家廟原廟  
等共十有四章肆筆而成睿思雅正宸文典贍所謂  
大哉王言也中興紀事本末高宗以御書正艸孝  
經賜泰檜檜請刻石以傳於後上曰世人以十八章  
童蒙書不知聖人精微之學因學艸聖遂以賜御豈

足傳後耶 書畫眼思陵  
筆法其源出於玉潤帖

猶是飛來小朶峰  
細泉穿石響琤琮  
上人昔自稱湖隱  
拂拭殘碑看舊容

清江集天竺簷蔔堂記昔僧慧理自西域至杭以其  
小朶峰為自身毒飛來者即其地置繙僧院後改院  
為天竺寺 攻媿集觀冷泉亭放水詩冷泉淺濁使  
人愁開板橫波去不休岸側細泉穿亂石始知別是  
一清流 玄牘記石刻有湖隱上人贊非俗非僧非  
凡非仙打破荆棘林透過金剛圈眉毛厮結鼻孔捺  
天燒了護身符落紙如雲烟有時結茆晏坐荒山嶺  
有時長安市上酒家眠氣吞九州囊無一錢時節到  
來奄如脫蟬湧出舍利八萬四千贊嘆不  
盡而說偈言烏乎此其所以為濟顛者耶

碑版無如羣玉工後來世綵亦稱雄仙花發萼名書在  
猶記重翻入禁中

墨池編宋羣玉堂帖所載前代遺跡最多韓侂冑刊  
石蹟記世綵堂帖廖瑩中刻金壺記顏書如神

劍推鋒仙花發萼書畫題跋記顏魯公  
劉中使帖載於宣和譜紹興中重進御

春草江南賸一邱空堂餒鬼故園愁十洲春色重門裏  
餘得春風舊酒樓

雙溪集南園詩花驄油壁隱輕雷消却冰山不復來  
墳土未乾為餒鬼園花雖好為誰開北轅錄淳熙  
丙申詔待制敷文閣張子政充賀金國生辰使至相  
州聞闕繁盛觀者如堵二樓曰康樂日月白風清又

二樓曰翠樓曰秦樓時方賣酒其上牌書十洲春色  
酒名也或云韓魏公畫錦堂今為一貴人宅石記猶  
在好事者叩門打碑不禁也  
攬轡  
錄畫錦堂尚存北人嘗更修飾之

假子清華第一班一飛何事不知還名孫死節留餘羨  
難洗當初老鳳姦

雲莊四六餘話秦相子嬉狀元登第李文肅賀啟曰  
一經教子素欽丞相之賢累月答兒敢起隣翁之羨  
秦甚喜之齊東野語秦嬉本王氏子檜素不悅檜  
畏內妾嘗孕其妻逐之生子為仙游林氏子曰一飛  
以檜故仕至侍郎兼給事中其兄一鳴弟一鶚皆位  
朝列曹詠嘗勸檜還一飛未果而檜死金壘子宋  
史秦檜曾孫鉅通判蘄州金人犯境與郡守李誠之  
竭力捍戰城破鉅率兵巷戰復歸署自焚死子浚澤

皆死奸臣之後一門死忠孝豈復繫其世類乎然檜  
無子以妻兄王喚子為後則秦氏世絕於檜久矣  
詞林海錯宋時紫薇舍人謂之小鳳翰林學士謂之  
大鳳丞相謂之老鳳 竹憲隨筆雁宕僧後身為泰  
檜居權要  
造諸惡業

海門蒼翠聳雙山忽起清風一線間為有渾沙三百里  
牛車須避迅濤還

見潮論龕赭二山峙為海門故激而為濤今觀其洶  
湧却去海門之外非二山所為也 潮賸潮之將來  
先以清風渺一線於天末旋隱隱而隆隆 浙江潮  
候圖說浙江之口南為龕山北為赭山謂之海門下  
有沙渾跨江東西三百餘里若伏檻然 猗覺寮襍  
鈔浙江風濤汎險人力不捷故近立諸堰以牛車舟

而過

坊間墨本幾差訛更怪麻沙減裂多自古文風闕世運  
異瀾誰識是同波

聽雨紀談古人書籍皆手錄唐世始刻板至宋末而  
益盛麻沙至陋臨安坊間動輒刻板然而減裂者衆  
矣佩玉齋類藁五七言始於漢歷六朝而盛於  
唐至嬴宋而音調卑矣同波異瀾用陸機語

三絃隔應琴書在八卦奇形古研留可與山家作清事  
何須更覓鬼功球

書齋夜話張炳炎咸淳辛未及第其父肖說為大理  
評事嘗與徐南溪論琴謂諸弦隔一之應皆在十徽

獨第三弦在十一徽此中呂之宮也南溪琴統玉譜  
其說本朱子 研譜周益公硯作八卦形自為銘

家山清事林龍發著林為和靖七世從孫當理宗時  
高抗不仕人謂其有祖風 格古要論嘗有象牙圓

毬一箇中直通一竅內車二重皆  
可轉動名鬼功毬宋內院中作者

雲氣鴻濛樹眾籬判教凡輩不容窺誰知天上春生曲  
流入金源總淚垂

畫繼米友仁被過光堯官至工部侍郎數文閣直學  
士日奉清閑之燕方其未遇時士大夫往往可得其  
筆既貴更自秘重雖新舊亦無緣得之眾嘲曰解作  
無根樹能描濛鴻雲如今供御也不肯與閑人享年  
八十無疾而逝 王氏畫苑米友仁畫樹作眾籬筆  
中州集吳彥高米友仁之壻會寧府遇老姬善鼓

瑟自言黎園舊籍因賦春從天上來詞  
後三山鄭域從張貴謨使金聞歌此詞

當壚鬼女貌如花細雨輕風漾碧紗聞道雷壇覆蛇怪

陰池誰遣誤金臺

楮記室宋吳宰撫州人於臨安聽調嘗飲酒肆一賣  
酒娼故人妾也吳呼問妾引至閨處語曰吾死雖為  
陰司所錄今賣酒於市今市上十之二三皆鬼也言  
訖不見小憲自紀宋時法師鉢貯白蛇覆於雷峰

墻下文園漫語西湖十景有雷壇夕照楮記室  
魏鶴山為參政一日留史教授宿館中夜忽有兩鬟

秉燭出迎云參政有請史隨入有頃鶴山出不見史  
令徧尋見在池塘中半身沒水問其故則曰丫鬟引  
至一大屋綠衣人指以小女為妻今夕成禮不知在  
水中次日令乾塘有一蝦蟆大如斗小者四五而已

故人相對泣紅妝一曲清歌欲斷腸  
少霓裳陪鳳輦  
不教下色等廚娘

行營襍錄豐有俊字宅之登青樓偶見小倡疑故人  
女累目之酒罷女入曰豐官人識妾否詰之果故人  
女豐曰汝且退豐與臨安尹有契明日以白尹且云  
某僅有錢百千從公更貸二百千嫁之尹嘉其誼即  
取入府厚奩具擇良士嫁焉尹即王宣子佐也又  
朱熠本武臣常為內夫人妹內官弟婚啟理廟見之  
大加賞異特旨授官至參知政事具啟有令弟從長  
奕世近龍光月殿斯沾於湛露舍妹夫人十年陪鳳  
輦霓裳猶聚於朝霞云云朱乃武舉狀元溫州人理  
廟微時識之江行襍錄京都中下之戶不重生男  
生女長成則隨其姿質教以藝業名目不一有所謂  
身邊人本事人供過人針線人堂前人劇襍人拆洗

人琴童棋童廚娘等級截乎不奈就中廚娘最為下  
色然非極富貴家不可用余以寶祐丁巳參闕嘗聞  
時官中有舉其族人置廚娘  
事首末甚悉漫書以發一笑

楊柳新塘裊碧絲便娟歌舞泥人時東風過了花飛盡  
不及銷魂有粉兒

湖海新聞德祐太學作百字令云真箇恨殺東風幾  
番過了不似今番苦東風謂賈似道也新塘楊柳小  
腰猶自歌舞謂賈妾 宋孝三朝政要似道蠱聲色  
寵妾葉氏本淑妃宮人也潘氏倪氏妓也 詩詞餘  
話詹天游名正字可大風流才思不減昔人故宋駙  
馬楊鎮有十姬皆絕色有粉兒者尤勝一日天游宴  
盡出諸姬佐觴天游屬意於粉兒口占一詞有不曾  
正個也消魂之句楊遂以粉兒贈之曰天游今日正

個消魂也後  
為翰林學士

玉瓢小印宛如初散佚重窺旅館虛一帖硬黃留健筆  
人間猶識瘦金書

洞天清錄徽宗御府所儲書其前必有御筆金書小  
楷標題後有宣和玉瓢御寶淳祐壬寅於臨安客舍  
見永嘉一士人藏一法帖乃唐人硬黃倣右軍書前  
有金字御筆云王右軍書長者帖後有宣和玉瓢樣  
御寶書史會要徽宗行草正書筆勢  
勁逸初學薛稷變其法度自號瘦金書

寒食平章上塚回集賢堂下獨興哀駭兒不解藏書畫  
可見吳興向氏來

詩話雋永賈秋壑於德祐元年寒食上母墳回至集賢堂作詩云寒食家家插柳枝戀春春亦不多時兒孫只解花前醉青塚能消幾箇悲豈非亡國之識按西湖志引此詩不載上墳事且後二句作人生有酒須當醉青塚兒孫幾箇悲亦與此異癸辛雜識吳興向氏后族也三世好古多收法書名畫有名公明者駭而誕長城人劉暄多能狡獪登賈師憲之門言之賈公賈大喜因遣劉誘以利祿遂按圖索駿皆六

品  
朝神

明兩為離是普安玉觀音進北朝官蕭森佛火松雲裏

度廟龍姿繪像寒

聖德事迹孝宗為建國公初育於吳婉儀丁丑制建國公封普安郡王年十六時日者尤若納私謂秘書

省正字張闡曰普乃並日字合乎易所謂明兩作離之象殆天授也 楮記室宋孝宗擊毬馬偶傷一目金人遣使來慶壽以千手千眼玉觀音為壽蓋寓相謹之意上命迎入徑山 暖妹由筆杭州集慶寺有紙軸度宗小像

泥金帖子報新名書上綸扉有品評春日桃符非麗句  
十年而已悞公卿

說略報新進士謂之泥金帖子始於唐至文宗時革之宋則復用 裨史洪平齋新第後上史衛王書自宰相至州縣無不指撫其短大槩云昔之宰相端委廟堂進退百官今之宰相招權納賄倚勢作威而已凡及一職必如上式未俱用而已二字時相怒十年不調洪有桃符云上式未得之乎一字力只因而已十年

閨

玉樓簾捲見梅魂  
催賦清詞月一痕  
照水圖開天水碧

露桃脉脉總無言

海野詞坤寧殿得旨次韻賦照水梅花調  
驀山溪云  
催花小雨輕把香塵洒  
簾捲水亭風梅影轉夕陽初  
下靚妝窺鑑  
鴛鴦湛清漪浮暗麝  
翦芳瓊消得連城  
價玉樓十二寒怯  
銖衣掛曾是綠華仙  
眷餘情新詞  
如畫花隨人聖須信世無雙  
騰鳳吹駐鸞輿堪與瑤  
池亞江村消夏錄宋馬和之有照水圖  
林下清  
錄宋顏方叔製諸色牋有杏紅露桃  
紅天水碧俱研花竹鱗羽精妙如畫

中興為有求賢詔  
不取金桴發玉角  
雪下天門空洒淚

有人側岸看千帆

新定續志有紹興求賢碑 鹿皮子集樂雷發宋理  
宗朝特科狀元春陵人對策有曰求天下之士以文  
不若淑天下之士以道樂著雪磯叢藁 雷溪詩選  
題宋度宗熙明殿古墨詩蚤晚扁舟適吳越為君揮  
淚天門雪 能改齋漫錄任惇夫紹興間有聲太學  
後坐上書入籍留落者久之有投時相啟云籠中翦  
羽仰看百鳥之翔岸側  
沈舟俯閱千帆之過

愛他十里清涼國吳越江分指顧間白骨難為補天石  
太行久已不能山

解頤詩話宋行都西山多寺觀鐘鼓相接故楊庶夫  
詩云八山十里清涼國三百樓臺迤邐開 南溪詩

話程泰之攷古編云到江吳地盡隔岸越山多此吳僧白塢院詩也后山在錢唐亦有句云語音隨地改吳越到江分即用其意岳忠武遺事元韓中村拜墓詩末云我恐精忠埋不得白日英魂土中泣朽骨斷出荒苔痕獻作君王補天石耕欄集靖康迎駕詩有云南渡黃河如履地東有太行不能山

番犬狺狺給賜多金鈴不動卧晴莎心知不愛春林牧  
休寫歸牛緩下坡

南宋相眼德壽宮發下番狗五十隻禁中留其三餘賜內侍岳鳴集題李迪畫大詩護兒偏吠客花下卧晴莎莫出東原獵春來乳兔多大江艸堂集閭次平風林放牧圖跋樹木離披老牧掩面支策牛獨舉首掀鼻向風嚴氏書畫記李唐放牧圖澹園畫品李唐三生圖作牛背牧童李源欠身揖之東

圖元覽李唐春牧圖牛欲前行童子力挽之案以上皆南宋畫院人

梅花細嚼傍山居佛粥醑醑出定初愛筍顛師能濟物

碧螺無尾半焦魚

柳塘集西湖除夕詩又來上國看新元細嚼梅花燕  
冷泉按道璩字無文宋南渡饒州詩僧山家清供  
一日過靈鷲訪僧蘋洲留午粥甚香詢之乃醑醑花  
也又濟顛筍疏云拖油盤內燂黃金和米鑊中煮  
白玉永興寺志錢唐西溪永興寺唐正觀三年悟  
明尊者開山南宋時濟顛壘石為安樂橋當水啣處  
巋然獨存村民食螺已斷尾顛乞放池中遂活至今  
螺皆無尾西湖竹枝續集徐楚詞云資嚴古院半  
邱墟滿壑梅花泛雪梁牘有顛  
師功德水至今留得半焦魚

難尋雲壑巖中跡空見雲龕水面移誰憶東都金世界  
空傳祝聖到靈芝

翰林珠玉有題玉隆宮所藏宋乾道宸翰雲壑二字  
詩南湖集西湖詩有云美人具清燕畫舫如雲龕  
浮游六橋間水天遙共涵宣政禱錄徽宗遜位前  
一年中秋後苑賦詩云日射晚霞金世界月臨天宇  
玉乾坤次年金人入汴亦先兆金世界也芸隱橫  
舟藻祝聖所拈香詩幾度來游幾賦詩又因將命到  
靈芝三呼祝了君王  
壽偷眼湖光立片時

一泓寒碧雨連山乳竇峰前聽講閒最是觸鋏修苦行  
誦經松下鶴初還

雕翁詩集紹興壬子夏游龍井詩江湖醺兩股一泓  
乃孤危我愛秦郎記字壓頭陀碑鄭氏聯璧集宋  
高宗自題畫扇云萬木雲深隱連山雨未開採芝  
集上天竺詩老樹烟蘿雨殘燈石墻雲雪簷稿送  
冲晦歸天竺詩西湖山下多奇石師去今遊乳竇峰  
遙想石臺登講罷野猿歸洞鶴歸松暎車志臨安  
下竺式道者苦行修懺置火鋤於像前日  
夜持誦環遶遇倦即以指觸鋤而醒之

逋臣前是老門生游戲清都一笑迎故國三皇廟猶在

靈胥江上涕縱橫

疊山先生集上丞相留忠齋書友朋自大都來乃謂  
先生以賤姓名薦皇帝過聽遂煩旌招某乃丙辰禮  
聞一老門生也先生誤以忠實二字褒之斷不敢枉  
道隨人以辱大君子知人之明又與魏參政書稱

前宋逋播臣皇帝游民謝某夢蕉詩話文山之死  
為兵解脫屣濁世耕遊清都覆瓿集杭州重修三

皇廟碑杭為宋故都以故大醫院地為之立三皇廟  
須溪集建興廟記東錢唐如雷如霆子胥之所旦  
而奮也方盛時冠冕大者帝號小者王侯丹雘  
鉅麗擬於鈞天廣內今其故地黯然使人流涕

玉津鐘廢暗香凝祕省銅缸碧水澄唱道飯僧何所益

香廚翠釜照秋鐙

翠雲集有玉津園廢鐘詩白娛齋集徐青壁使君  
置酒邀看南闕署中宋梅按地即德壽宮後園旁也  
藥雲集宋秘書省有銅缸焉積水生魚皇華曲  
九里松詩松是山靈一手栽堯天長就棟梁材龍髯  
怒起春風急似怪遊人喝道來靈隱寺志春  
檜因風僧激礪發心齋僧其大鍋現在雲廚

曲從自製盡堪師雲影孤飛白石詞羨殺王孫才思敏  
蓮塘惟有落花知

白石詞揚州慢暗香疎影並是自製曲樂府指迷  
姜白石如野雲孤飛去留無迹詞旨蘄王孫韓鐸  
字亦頗雅有才思學詞於樂笑翁一日與周公謹泛  
舟西湖酒半公謹舉似亦頗學詞之意翁指花云蓮  
子結成  
花自落

鐵綆沉來箭鏃埋巾籠放鳥失安排空饒紅朽豐儲積  
澤國圖安只自乖

寰宇分合志烏珠之陷臨安已隱然如巴延之臯亭  
山而宋得以不喪者由其懸軍深入視元無分道之

兵席捲北歸視元有江中之血使舟再沈於鐵綆而策不獻於閩人則烏珠為籠中之鳥矣 自怡集錢唐詩箭鏃不隨錢氏沒黍苗還向宋陵生 清正集嘗會計豐儲之積約五百萬石多為備荒之用而大農每歲廩給止合用米一百萬石通計可支五年李忠定奏議備攻戰之策必擇形勝然後能制服中外以圖事業臨安平江皆澤國禍迫偏霸所據非用武之地也

宴開澄碧捧瑤尊再拜彤墀笑語溫日暮玉堂深處宿金蓮燭影獨承恩

玉堂襍記淳熙丁酉九月丙辰宣召侍讀進少保浩錫宴澄碧殿抵暮送以金蓮燭宿玉堂直廬上命作詩叙此會史進古詩三十韻

臨平山下藕風輕軟軟鴻頭似雪螢聞道尚方新薦果

安榴猶自號金櫻

林泉結契雞頭亦號鴻頭天中記杭州號石榴為金櫻避錢武肅諱而起也

苔繞梅身半吐鬚洗鉛何必較施朱鬢絲禪榻藏春塢  
猶有凌霄絡樹無

竹齋集西湖梅有素梅紅梅墨梅數十首全芳備祖西湖藏春塢門前有一古松凌霄花絡其上蘓公嘗為僧清順賦詩今百餘年其花猶茂

冠上金貂氣象尊瘦髯誰與貌師垣夜光最訝雙眸少

賀啓中間欠片言

樂郊私語常氏有像一幅瘦惡而髯帶貂蟬冠上有贊曰佑時生甫同德暨湯云云後題紹興壬申門下士魯璵拜書檢宋苑茂明集有代賀秦太師畫像啓乃知是摘啓中數語為贊耳 偃曝談餘檜眼有夜光

朝中和議盡姦回錯說官家也好歆不使雙鬢同炭婦  
春愁脉脉為誰來

吟嘯集沈持正名樞紹興中參政和議成語同列云官家好歆上聞之摘筠州攜一鬟去數年歸嫁皆處子安吉尉潘方壽以詩寄曰昔年單騎赴筠州覓得歌姬共遠遊去日正宜供夜直歸來渾未識春愁禪

人尚有香囊愧道士猶懷炭婦羞鐵  
石心腸延壽藥不風流處却風流

華陽巾子道人如樞院行行近大渠操履甚恭雖隱語

陽妃腳也駭程俱

揮塵餘話向宗厚腹方建炎末為樞密院計議官美  
髯而若滑稽之狀裹華陽巾纏足極彎長於鈎鉅王  
份公為戲之曰君唐明皇時四人合而為一何邪向  
曰願聞之公為曰君狀類黃幡綽頭巾類葉法善脚  
類楊貴妃心腸似安祿山後程致道行其祠部員外  
郎告詞云汝佩服高古操履甚恭又以戲之 夢梁  
錄樞密院在南  
倉前大渠口

節樓兩建靜干戈証果曾經過補陀羨煞明良慶會閣

一門六老共婆娑

雨航襦錄史衛王浩為尉時至補陀見大士云文潞公後身他時宰相官家要用兵須力諫浩後兩授節鉞遍歷三公壽八十九嘗曰吾口不言兵後必有為宰相者彌遠乃其次子山堂肆考孝宗書明良慶會之閣六字賜史浩宋史浩淳熙乙巳掛冠年登八十女兄年八十二四弟又皆高年同氣至親舉觴相屬朱顏華髮咸壽而康繪為六老圖樓參政為之序

雨山霜鞠掩荆扉  
寓馬嗟西客到稀  
好事河陽張彥發  
芸居樓畔借書歸

馬嗟藁嘉熙丁酉五月寓京遭燕僑房西馬嗟有寓西馬嗟詩十畝荒林屋數間門通小艇水灣環人行

遠路多嫌僻我得安居却稱閒樽酒相忘霜後鞠一  
時難盡雨中山何年脫下浮名事只與田翁賸往還  
秋江烟艸有從陳宗之借書詩自從春去後少省  
出柴扉樹暗鴉巢隱簷空燕迹稀憶山憐有夢當暑  
咏無衣案上書堆滿多應借得歸案吳文英有  
題陳宗之芸居樓詞即睦親坊開書肆陳道人也

仁王寺裏熟黃梅誰識方泉杖履來更向九溪十平八

澗臨流洗足帝青苔

方泉集有歸憩仁王寺詩重到招提未覺遲鉢單初  
副袂衣時僧房齋院門門閉梅子枇杷樹樹垂蟻蔭  
經牀求脫化龍纏佛座學慈悲長年無事閑來此坐  
對空山諷小詩又有句云九溪十八澗冷見帝青苔  
洗足僧書石臨流客放杯案仁王寺在吳山南渡  
時建田志引薩天錫橫山閣詩乃在閩中烏石山之

仁王寺謬矣方泉常居行都者此詩確是吳山之仁王寺也西湖北山亦有護國仁王寺

侍郎三覺困曹騰歇息牌懸客慣憎比較相公三照處

裏頭日日近圓冰

雞肋集趙叔問為天官侍郎肥而喜睡又厭賓客常掛歇息牌於門首呼為三覺侍郎謂朝回飯後歸第也又云范覺民作相方三十二歲肥白如冠玉旦起與裏頭帶巾必皆攬鏡時謂三照相公按趙范皆

高宗紹興間人

鞠苗淪盞扶春倦花片浮苔怯曉寒御墨搜奇吟逸蝶  
嬌姿偏柰雨中看

花史洪景嚴道和弟景盧蓮登月臺詩云築臺結閣  
兩爭華便覺流涎過麴車戶小難禁竹葉酒睡多須  
藉鞠苗茶山家清供憲聖太后喜清儉今後苑進  
生菜必采牡丹花片和之人收楊花為鞦韆毬襴之  
屬海棠譜光宗御製海棠詩東風用意施顏色艷  
麗偏宜著雨時朝咏暮吟看不足羨他逸蝶宿深枝  
門館遙臨南北峰平章堂印日相從他年十萬軍聲亂  
洲上遺亡何處踪

黃氏日鈔賈似道始生之日錢唐宰郭應酉以詞賀  
之云日長門館坐對南北峰之高時遊廟堂盡付東  
西廳之問東西廳見韓魏公傳若南北峰殆俗語耳  
豈一時阿其所好耶兩浙名賢錄陳均字子公咸  
淳初除檢正會賈似道以平章奉母居湖濱欲以堂  
印自隨均爭曰堂印無出城之理由是免官三朝

政要賈似道集諸路軍十三萬屯丁家洲我師之敵十三萬軍一時潰散督府之印已失奔入揚州

德壽宮姬取次娛大劉宣過小劉呼夫人更得十平餘

輩不數宮中有玉奴

朝野雜記德壽妃嬪劉妃臨安人入宮為紅霞帔後拜貴妃時有小劉氏者入宮轉宜春郡夫人進婕妤皆有寵宮中號妃為大劉嬈子婕妤為小劉嬈子德壽宮又有信安趙夫人咸寧蘭夫人平樂王夫人咸寧郭夫人新興陳夫人富平孫夫人縉雲蔡夫人南平張夫人齊安張夫人安定李夫人此十餘人並無品秩紹興中又有馮美人韓氏二才人皆寵幸吳氏名玉奴中宮近屬也南宋相眼內東門司淳熙十四年準德壽宮提點傅太上皇帝聖旨才人李氏王氏並放令遂便其告命四軸并才人李氏從人紅霞

帔宣一十道紫霞帔宣聽宣各二十道並降付內東  
門司才人李氏王氏告紅絲網鍍金銀鐸鈴紅羅銷  
金袋全齊安郡夫人順政郡夫人告紫絲網銀鐸鈴  
錦袋全紅霞帔宣九道李惜奴陳來兒等紫霞帔宣  
二十道藍合兒藍福福陸小美趙九孃譚強  
兒譚小郁等聽宣二十道陸閏兒元冲淨等

舊碑遺字得雙行聽說西霞浣古香自奉宸居標襖帖

神光難掩在宮牆

蘭亭考一修城所得本前有薛稷書兩行十八字後  
高宗取石入德壽宮王仲信跋云此本西霞老道士  
云長安政和中修故宮掘地得此其精神鋒銳出  
正定本上又蘭亭序高宗所御宸翰題曰禪帖

鬻新醜語竟能堪異日華班抱隱慙鳳閣裁同妃子笑

西風已駕逐臣驂

三朝政要呂文德安豐人魁梧勇悍常帶薪城中趙  
葵於道傍見其遺履長尺有咫訝之或云安豐鬻薪  
人也遣使訪其家值文德出獵負虎鹿各一而歸偕  
見趙留之帳前在邊立功遂至顯官黃氏日鈔呂  
文德起土豪似道始結之為大將官至保傅然文德  
愚鄙小民不識字每佯痴好無禮士大夫似道既入  
相文德寫醜語罵似道不敢怒至郡不肯禮先聖祭  
先聖每云不曾教我識字宋史紀事本末賈似道  
以去要君帝拜留之江萬里曰自古無此君臣禮賈  
忌之帝常問古人姓名似道不能對江從旁代對王  
夫人稍知書帝語夫人以  
為笑賈益慚怒遂逐萬里

南荒一逐使人愁林氏油杉蚤見收遷客墨痕蕭寺壁

相逢生怕唱杭州

癸辛襍識林愈樞存儒久為賈相所擯謫之南州道  
死於漳有富民蓄油杉甚嘉林氏子弟求為棺而價  
穹不可得因換其木曰收取收取留與賈丞相自用  
至賈殂於木綿蒼郡守經營竟得此木以歛可謂異  
矣正藏書似道貶循州鄭虎臣請行時侍妾尚數  
十人鄭悉屏去奪其寶玉暴行秋日中令舁轎夫唱  
杭州歌以譴之辱之備至至古寺中壁有吳潛南行  
所題字呼似道曰賈團練吳丞相何以至此賈慚不  
能對

雁足書傳紫塞長只收鄴瓦貯歸裝忠宣不愧蘇卿節  
未賜洮瓊御筆光

容齋續筆先公自燕歸獲二硯予為銘建安者曰鄴瓦所範嘻其是耶幾九百年來隨漢槎萍兩筆鋒肆其滂葩側實實此以昌我家銘興和者曰元魏之東狗脚於鄴吁其瓦存亦禪千劫上林得雁獲貯歸笈玩而認之哀淚棲睫談薈宋孝宗賜周必大洮河綠石硯有御筆洮瓊二字

鞦韆庭館賞花王三殿清遊樂未央唱得舞楊花曲罷  
天香飛滿萬年觴

貴耳錄慈寧殿賞牡丹時椒房受冊三殿極歡上洞達音律自製曲名舞楊花命小臣賦詞俾貴人歌以侑玉卮為壽詞有云正鞦韆庭館風絮池塘占東君誰比花王

玉輅鐫成玉篆牌猫兒捕鼠對原垂執綏官亦何為者

孤負梯緣向御街

玉海乾道六年復用五輅玉輅有執綏官備顧問有牌篆玉輅二字以玉為之三朝野史理宗祀明堂徐清叟為執綏官玉音問曰緇兒捕鼠如何答曰愛之欲其生惡之欲其死理宗本命屬鼠一時不覺觸突上亦不之咎玉堂稭記玉輅執綏官從旁用小梯攀緣而上

聖節趨班禮數殊紫宸殿下效嵩呼南廊細認髹牌字若個無因入御廚

程史瑞慶節上壽紫宸殿百官皆賜食余待班南廊老兵持二髹牌至金書其上曰輒入御廚流三千里吳鹽如雪繞場堆亭戶攤錢晝不開昨夜東風駕濤上

石塘堅對莫崩摧

天下鹽法志浙鹽鬆白宋時濱江設立亭戶計日課  
斛支給其法統於轉運使地理指掌圖宋時沿江  
置捍江軍東風濤上尤加警備海塘記序海塘自  
錢唐以抵鹽官每為風濤所崩塌故沿江設備守茲  
土者時  
寄慮焉

場屋誰居第一流柱間小紙亦堪羞不如買却巾箱本  
喁喁爭鳴語蚤休

四朝聞見錄慶元二年考官葉翥發策首篇士愕莫  
知對莫子純以小紙帖所出於柱間士皆感之是時  
舉子不事記誦專習於空虛之談射策中至有心心  
有主喁喁爭鳴之語識者固已患之鼠璞今巾箱

刊本無所不備嘉定間從學官楊璘之奏禁  
毀小板近又盛行第挾書非備巾箱之藏也

酒龍詩虎葛長庚跣足時時自在行太乙宮中因詔館

一朝飛去入蓬瀛

武弁山志白玉蟾本姓葛名長庚嘉定末詔徵赴闕  
對御稱旨命館太乙宮一日不知所往海瑯集賀  
新郎詞昔在神霄府是上皇嬌惜便自酣  
歌醉舞來此人間不知歲仍是酒龍詩虎

老卒曾經百戰場韓家弓樣獻高皇為銘克敵成功處  
邊鄙人多號鳳凰

揮塵後錄洪景伯兄弟應博學宏詞以克敵弓銘為  
題洪惘然有巡鋪卒曰我本韓世忠部卒目見有人

以神臂弓舊樣獻於韓韓令如其式制度以進賜名  
克敵又邊人又謂鳳皇弓宏簡錄和說以陰為  
右武大夫威州刺史上制勝強遠弓式能破堅三百  
步外號為鳳皇弓三朝比盟會編金人犯瓜州都  
統制李橫用克敵弓射却之

江湖自古有攸分綿纜牙檣何地乘水勢錢唐居第二  
韜光東去望西興

入越記淳熙元年八月步楓江上俗諺云第一楊子  
江第二錢唐江第三楓江蓋言其水波之惡也青  
山集和楊公濟泰皇纜船石詩泰皇兩觀海此石繫  
樓船錦纜已無跡蒼苔昏暮煙南歸日記初至靈  
隱求所謂樓觀蒼海日門對浙江潮竟無所有至韜  
光了了在吾目中矣名山記內載袁宏道西湖襍

記余始入靈隱疑宋之問詩不似及登韜光始知滄  
海浙江桐蘿剡木數語字字入畫古人正不可及矣  
端平詩雋韜光菴詩谷鳥與我言怒殺白太傅借  
問何以然攜却山僧去世間萬事誰始終寂寞寒江  
起煙霧西湖竹枝詞儂住西湖日日愁郎船只在  
東江頭憑誰移得吳山去湖水江波一處流毛先  
舒西湖不通江辯云案舊志云西湖故與江通誤也  
田學使汝成嘗辯之然未能了了按水經註浙江至  
錢唐縣又東經靈隱山山下有錢唐故縣靈隱去江  
已遠然山川之名古今屢變或當時靈隱山直抵江  
干俱名靈隱猶言吳中亦稱會稽浙江亦稱廣陵耳  
若以駱賓王楊巨源之詩為徵靈隱山至絕頂何嘗  
不可觀日對潮楊詩義亦然又西湖南面稍近江而  
尚有慈雲萬松二嶺大山隔之他處去江更遠古必  
無湖通江之理也

臨安客子動春愁細雨無人深巷幽官吏打門驚午夢

### 清風終憶十三樓

橘潭詩藁臨安餞樓詩過了燒燈望燕歸春寒剗地  
勒芳期杏花深巷無人賣細雨空簾盡日垂文獻  
通考店宅務掌管官房邸舍默堂集昔年曾到十  
三樓一月西湖十頃秋寒碧軒中最宜暑只緣修竹  
近清流一統志大佛寺  
有相嚴院為樓者十三間

九經墨義盡敷陳鏤院深沉聽鬼神試帖不因公薦外  
邸中先報易官人

宋史凡九經帖書一百二十道對墨義六十條又  
命士應舉謂之鏤廳又臺閣近臣得薦所知之負藝

者號曰公薦 夸堅志士人赴試臨安邸主人夢報  
榜人至云此店有易官人及第明日以告長沙郡故  
多易姓是時獨無春陵義太初歷數諸人  
用易經應詔者惟已一人私自喜果登科

酒器新翻日日忙王家孽子習文章水晶宮裏榴皮老

### 虛說東林送渭陽

齊東野語性蠢騷日治酒器書畫揮麈餘話秦  
燔本王喚孽子嫡母鄭妒燔既誕逐所生以燔為檜  
之乞子宏簡錄朱敦儒素工詩及樂府時檜當國  
喜獎用騷人墨客文飾太平燔亦好詩除敦儒鴻臚  
少卿談者謂畏避竄逐故其節不終萬歷杭州府  
志李軌遷將作監檜屢遣子就學軌曰吾為天子卿  
監豈為宰相教子遂乞外雲麓漫鈔秦伯陽送其  
舅王亨道知湖州詩暫別甘泉豹尾中隼旗仍駐水

晶宮文昌地禁論詩少燕寢凝香簿領空可但龔黃  
宜共理便應顏謝與同風飽聞回老榴皮事試問溪  
頭鶴髮翁說者謂呂仙常到湖之東林訪沈東老留  
詩既而登東林寺於壁間以榴皮自畫其像人初不  
知及秦詩出  
觀者不絕

遺都莫謾溯繁華椒壁觚稜半土沙節用愛人題石在  
城頭夜月照飛鴉

鳧藻集序錢唐為前代之遺都風氣清美有山川臺  
榭之勝魚稻茶筍之饒民習侈巧屋宇繁麗歌管之  
聲不絕於西湖之上故仕者尤樂居焉元詩類選  
杜瑛弔故宮詩月上觚稜椒壁濕饑烏啄碎琅玕石  
叔灰飛盡海揚塵廢殿荒臺土花碧西湖竹枝續  
集黃周星詞節用愛人猶勒石風流誰是老平章按

節用愛人視民如傷八字石刻在寶石山足相傳為  
似道書也 大明風雅廣選劉基題白塢寺物換星  
移事已迷從來此地惑東西可憐  
如鏡中天月獨照城烏夜夜啼

產閤先期報設排胎衣裝畫寶瓶埋洗兒錢果多珍巧  
聞道中宮日隋懷

客齋四筆車駕都錢唐以來皇子在邸生男女則戚  
里三衙皆有餉獻隨即放答自金帛以外洗兒錢果  
動以十數合極其珍巧 武林舊事宮中誕育內司  
奏排辦產閤令太醫宿直供畫產圖方位合用藥材  
催生物件醺醖沈香酒催生海馬皮  
裝畫胎衣餅檀香匣盛唾銅剃刀

六龍巡幸護天神畫到通靈果絕倫鱗甲之而飛動處

不知誰是點晴人

夸堅志西北士大夫多挈家南寓相率建黃籙醮就  
天慶觀設位父老鄭圓持水龍布帳展挂於堂中陰  
風振動燈火俱滅坐立者毛髮寒聳舉體森顛亟命  
捲還之帳不知何人所畫其神如此 宋元通鑑淳  
熙十四年以久旱頒畫龍祈雨法  
案天慶觀在杭之吳山天慶坊

徒步宮人盡出降滑臺昨夢語猶懣丙丁已是留龜鑑  
頭白金姬夢此邦

靖康朝野僉言靖康二年丁未二月初七日上皇與  
諸王后妃以下乘金銅車子詣北營內人宦官多相  
攜步從 昨夢錄紹興辛巳省元劉德廣語及余所  
生之地曰滑臺 戒菴湯筆理宗淳祐中中書省奏

名臣柴望衢州人撰丙丁龜鑑言丙午丁未自古多  
變厄凡三十有一為十卷金姬別傳李嘉謨以部  
發歲運至元都夜對月歌曰萬里倦行役秋來瘦幾  
分因看河北月忽憶海東雲夜聞鄰婦倚樓泣者明  
日訪其家此婦泣曰客非昨夜悲歌人乎此亡宋昭  
儀黃清惠寄汪水雲詩我亦宮人金德淑也昭儀舊  
同供奉極相親愛今各流落異鄉彼且為泉下人矣  
潛齋集杭州詩相逢柳色還青眼說著梅花總白  
頭

表章正學有津涯何事禪房獎艷娃至竟遺民瞻太保

龍顏曾寫郭蕭齋

史纂左編宋自理宗繼統首黜王安石孔廟崇祀升  
瀛洛九儒表章朱熹四書丕變士習廟號曰理其庶


幾乎七修類藁宋理宗像在集慶寺南歸日錄  
集慶觀理宗舊像意製寒儉然行筆樸雅絕不類傳  
粉大家宋季三朝政要理宗資貌龐厚號為烏太  
保太平清話宋理宗御像郭蕭齋所寫葉雲集  
理宗閭妃塚  
在集慶寺後

弓手兒童貌不羣狀元甘雨埽妖氛鰲頭果見舒龍爪  
觸石拏開白白雲

李堅志汪應辰本玉山縣弓手兒喻子材為尉授諸  
子學有兵云汪兵子可學喻呼視之狀貌奇偉出對  
試之曰馬蹄踏破青青草汪對曰龍爪拏開白白雲  
宋史趙鼎為相延汪應辰於館塾紹興舉進士第  
一歲旱鼎命禱雨即應人謂  
相公雨鼎曰不然狀元雨也

為有奇才待至公  
炎荒草木蘊隆風  
早知名以青雲累  
羞煞冬青哭野中

宋詔令寶祐四年陳顯伯為考官詔曰爰東儒官董  
司文柄議論端確者必忠於體國智略雄偉者必善  
於籌邊爾其決擇以成威觀是年文天祥第一及第  
元音徐世隆挽文丞相詩有云乾坤日月君臣在  
海嶺風霜草木知 承旨趙公行狀公見過世祖上  
問留夢炎狀元宰相當似道誤國時曾無一言卿為  
朕賦詩以刺之詩成上深賞焉 松鄉集贈唐  
玉潛詩世上冬青高誼少山中日錄好詩多



南宋禱事詩卷三